

Mak

*Jon Naan Igunēdiya Tamo Naab Dodok Fenen
(Matyu 3:1-12; Luk 3:1-18; Jon 1:19-28)*

¹ Jesus Kristus, Negur Naal nigin, biya od gariya inoya.

² Profet Asaia nē itotoya bun ibodok:
“Aya neu arū tamo ĩ ket sur afe di, ĩ yuyu ilauf,
ogon naab dodok foug.”*

³ “Ait taka gerere tuan iweig irok,
‘Odug nē naab dodok ge fen,
madur wenēg.’”†

⁴ Age fiya nigin, Jon isin, tamo kayau gerere tuan od irokenēdi di, waud falei del, nedi mosor yaleleya nigin naan igunēdin.

⁵ Judia kalilī fiya, Jerusalem tamo kayau ganam, ĩ garan dilen. Idi neid mosor kurō difesi di, idi im Jordan naanū naan igunēdin.

⁶ Jon kamel siwi nem gabar diwan anī ifonūdig. Agef fen, gaar gabar nem lū diwan anim luwa gu fedig. ĩ totobi nin te ado yōdig.

⁷ Eī enī yogon od iron, “Taka ĩ aya dumeun dō fiyauf, anī ere, in megeir neu wal fiya. Aya to biya nigin, iborou bobou fe fen, in ye su nē malū biru fiya kisi feleya sā.‡

⁸ Aya naan nem aguneik, anī ere, ĩ Awa Uur Fateulem iguneif.”

* **1:2:** Malakai 3:1 † **1:3:** Asaia 40:3 ‡ **1:7:** Juda neid tobonunā anī, sain tamo yana ado isi di, idi neid kabī tamo in ye su nē malū biru difedig.

*Jesus Naan Igun Ado Ì Bun Kisi Fiya Wõ Yen
(Matyu 3:13-4:11; Luk 3:21, 22; 4:1-13)*

⁹ Sain anĩ bun, Jesus Nasaret taun oun Galili nediwom isi, Jonem Jordan naan igunen.

¹⁰ Jesus naanum fã yale fen, ì lof mog, saa tano kãf fen, Awa Uur kuburir gen, ì bun isi mog, ilen.

¹¹ Age fe di, ait taka saa ilunem isin, “Õ neu Kesu, õ nigin aya wau laa fedig, õ nigin aya wau kulĩ yedig.”

¹² Kaisã bagai, Awa Uurem sur fiyẽ di, gerere tuan ilen.

¹³ Ì gerere tuan an, naa foti ibod mog, Satanem kisi fiyen. Ì gaar kuĩ geid difar mog, engel idim anĩ ì disennen.

*Jesus Nẽ Dõ Fiya Tar Uyulil Iweignẽdin
(Matyu 4:12-22; Luk 4:14, 15; 5:1-11)*

¹⁴ Jon kalabus bun dinenen ibod mog, Jesus Galili ile, Negur nẽ biya od anĩ kurõ feis iron.

¹⁵ Ì iron, “Sain mogo isil. Negur nẽ tano mogo melsak. Wauĩ falei wog fen, biya od enĩ nigin wauĩ momoi gei!”

¹⁶ Jesus Galili maaĩ yeri iyo ken, ì Simon, ne tura Endru ado, daliyou bun kakãg dirã mog, iledin, ere nigin, idi gau yaleya tamo. ¹⁷ Jesus iron, “Usig, dõ wiyag, aya ã tamo gei fiya nigin aneyeif.”

¹⁸ Sain anĩ bun bai, nedi kakãg ditor ken, ì dõ difiyen.

¹⁹ Sain ì naal iyok ile fen, ì Sebedi naal Jems, tura Jon ado, waag namen, idi neid kakãg dodok dife mog, iledin.

20 Kaisā bagai, ï iweignēdin. Age fe di, idi temeid Sebedi, in kabī tamo oroi yaledin anidi geid waag bun ditorneīd fen, Jesus dō difiyen.

Jesus Kaa Sane Irun
(Luk 4:31-37)

21 Idi Kapenaum taun dilen. Sain Juda neid uub naa Sabat wō ye di, Jesus Juda neid uub fō namen ile fen, od ifelnēdiya gariya inon.

22 Tamo kayau in od nigin terē den, ere nigin, ï tamo yana adom gen ifelnēdin, ï lo ifelnēdiya tamo gen sā.

23 Agef mog bai, tamo taka kaa sanem ironen anī, nedi uub fō namen an kaī ye iron,

24 “Ō amā ere naig wamā fenē, Jesus Nasaret tamal? Ō amā daig wamā fenē nigin usil de? Aya ō nigin keleī, Negur nē Fateul bagai!”

25 Jesus total ado iron, “Foro wol! ï namen tamal ulō weis!”

26 Kaa sane, tamo anī total bagai yokū fiyē, sur fiyē, ira ken, kaī ye, ulō yesin.

27 Tamo kayau ganan terē de fen, abob toti difen, “Eī ere? Keleī mata, agef fen, total ado! ï irō di, kaa seseneg dō difedig.”

28 ï age fen anī nē od kaisā bagai, Galili kalilī fiya fonō anī adok iyokelen.

Jesus Musei El Fedin
(Matyu 8:14-17; Luk 4:38-41)

29 Sain Juda neid uub fō ditor ken, kututū desin, idi Jems Jon ado weim, Simon Endru ado neid fō bun dilen.

³⁰ Simon nē mam, ĩ bouwa uruwa odug ado nigin fatarē yenen, anī idi ĩ nigin Jesus dirokenen.

³¹ Anī nigin, Jesus kayau wagen ile, kayau ima yales irou isennē di, fā yen. Age fe di, bouwa uruwa anī kayau folo fiye kele di, kayau ĩ aruneid yalen.

³² Aragau anī bun gaa kuru kel mog, tamo kayau dagi adodo, kaa sesen adodo ganan, Jesus wagen guri difeid, disin.

³³ Taun anī nē tamo kayau ganan, fofomala anī bun guru difen.

³⁴ Anī bun, Jesus, tamo kayau dagi fire fire adodo musei el fiyēdin, kaa sesen musei irudi di, diyawon. Anī ere, kaa sesen idi ĩ nigin kelein. Anī nigin, idi to wogō douf nigin sigoreid ifofan.

*Jesus Moilin Negur Kosē Fiyen
(Luk 4:42-44)*

³⁵ Bonimei bagai mumurei ado, Jesus fā yale, fō itor, moilin ile, an Negur kosē fiyen.

³⁶ Simon ĩ, ne tã tar geid dimirne ken, dilen.

³⁷ An fotou difiye ken, idi dirokenen, “Tamo kayau ganan õ dimirnok!”

³⁸ Jesus aitedin yale iron, “Ada uyu takã talauf, fonō melsã anī bun. Aya aneg od arōf, anī nigin aya asin.”

³⁹ Age ye fen, Jesus Galili kalilī fiya ganan bun iyo ken, nedi uub fō fō bun od iro ken, kaa sesen irudi di, diyawon.

*Tamo Taka Lepra Dagi Ado
(Matyu 8:1-4; Luk 5:12-16)*

40 Tamo taka lepra dagi ado, ï wagen isi, ibor bobou fe fen, igon, “Õ oroyõf are, el wiyauf.”

41 Jesus wau gudũf fen, ima irã, kobũ fiye ken, ï iron, “Aya wau irok, õ bouwã biyaf!”

42 Age ye di, kaisã bagai lepra guruma ï itornẽ di, bouwa biya len.

43 Jesus kaisã bagai totol bagai weder irou fen, sur fiyẽ di, ilen:

44 “Karĩ welei, enĩ aib taka to urokenẽf, anĩ ere, õ pris wagen ule, õ bouwã ufelnẽf, õ bouwã biyal anĩ nigin Moses nẽ od irok anĩ dõ fen, sesewi fiya wenẽf, anĩ bunem yaore di, tamo kayau dilouf.”

45 Anĩ ere, ï iyok ile fen, kurõ feis irõ di, od anĩ iyokelen. Anĩ nigin, Jesus mal atun taun taka bun to iledig, ï moilin ibodon. Anĩ ere, tamo kayau firen firen temeleid fau fau ï wagen disidig.

2

Jesus Tamo Bouwa Ilolaisin Anĩ El Fiyen (Matyu 9:1-8; Luk 5:17-26)

1 Naa tunĩ bure fele di, Jesus baban Kapenaum taun ile di, tamo kayau idi, ï fõ taka bun ibodok yeya anĩ karĩ den.

2 Anĩ nigin, tamo kayau musei guru difen, fõ aaben ado fofomala dino dale di, modoũ san. Age dife di, Jesus od irokenẽdin.

3 Jesus od irokeneĩd mog, tamo tunĩ tamo ilolaisin anĩ tamo aiwa ifenẽyam faali de, dirou disin.

4 Idi ï Jesus garan irou ileyã kisi feleyã sã, ere nigin, tamo kayau musei, anĩ nigin, idi Jesus

ibodok nē fō soko anī korō difel fen, tamo gabgab bun yen mog, folo folō dife di, isilen.

⁵ Jesus idi neid momoiya ile fen, ĩ tamo ilolaisin irokenen, “Kesu, ogon mosor alelkonok.”

⁶ Age fe di, lo ifelnēdiya tamo tunī an dibodon, idi dogo namedin kisi difen,

⁷ “Ere nigin ĩ age irok? ĩ kono fef! Taka nem mosor yaleleya to yenek, Negur yogo dogol.”

⁸ Kaisā bagai, Jesus yogon kisi bun, idi waudim kisi difen anī kelein. Agef fen, ĩ idi irokenēdin, “Ā ere nigin agog kisi gef?”

⁹ Tamo ilolaisin anī irokenēya nigin nanī anī karika, ‘Ogon mosor alelkonok’ de, ‘Fā wo, ogon gabgab wale fen, uyok ule’?

¹⁰ Anī ere, Tamo Naal ĩ tenebur ein mosor yaleleya nigin yana ado anī, ā keleī youf nigin...” Age ye fen, ĩ tamo ilolaisin anī irokenen,

¹¹ “Aya ō arokonok, fā wo, ogon gabgab wale fen, fō bun ule.”

¹² ĩ fā yale, ganan meleid bun in gabgab yale iyok ilen. Age fe di, tamo kayau ganan terē de fen, Negur yana dales diron, “Ada kulu ereb eig fiya taka to tailen!”

Jesus Lewi Iweignen

(Matyu 9:9-13; Luk 5:27-32)

¹³ Jesus ĩ baban daliyou sirin ilen. Tamo kayau musei ĩ wagen disile di, ĩ od gariya ino ifelnēdin.

¹⁴ ĩ iyok ile, Lewi, Alfeus naal, takis yaleya fō bun ibod mog, ile fen, irokenen, “Aya dō wiya.” Age ye di, ĩ fā yale, dō fiyen.

¹⁵ Jesus Lewi nē fō bun saaf yō mog, takis yaleya tamo musei, mosor adodo tamo kayau musei, ĩ,

in dō fiya tar geid, weim saaf don, ere nigin, idi musei Jesus dō difiyen.

¹⁶ Sain lo ifelnēdiya tamo, Farisia tamo idi, Jesus ī takis yaleya tamo, mosor adodo tamo kayau geid, weim saaf doko dibod mog, dileid fen, idi in dō fiya tar anī to difiyēdin, “Ere nigin ī takis yaleya tamo, mosor adodo tamo kayau geid weim doko?”

¹⁷ Anī karī ye fen, Jesus idi irokenēdin, “Dagi sã anidim dokta bun ileyā nigin waud to yenek, dagi adodom dogol. Aya madur tamo anidi iweignēdiya nigin to asin, mosor adodo tamo anidi iweignēdiya nigin asin.”

Kuri Nigin Jesus To Difiyen
(Matyu 9:14-17; Luk 5:33-39)

¹⁸ Jon nē dō fiya tar, Farisia tamo geid, idi kuri den. Tamo tunī disi, Jesus to difiyen, “Naig fe di, Jon nē dō fiya tar, Farisia tamo nē dō fiya tar geid, idi kuri dedig, anī ere, ogon idi sã?”

¹⁹ Jesus aitedin yale iron, “Naig fe di, mois tamo ibod mog, in tamo tar idi kuri douf? Idi to age difouf, ere nigin, ī idi geid fau dibodok.

²⁰ Anī ere, naa fau isi di, anī bun mois tamo idi bun tamal yalelnē di, naa anī bun gama idi kuri douf.

²¹ “Tamo taka, gabar tubu, gabar masak mata ado baguf fen, to iwauf. Taka ī age fouf are, masak mata anim tubu arirī fe di, tubu kudef irailauf.

²² Takag age fiya, taka nem wain mata meme gabar* tubu bun to itinēf. Ī age fouf are, wain

* **2:22:** Juda neid tobonunã, idi meme gabar nem darum diwadig.

anim age fe di, meme gabar gē ye fen, serek foug. Age fe di, wain meme gabar ado sane lauf. Age fiya nigin, ĩ wain mata meme gabar mata bun itinēf.”

*Jesus ĩ Sabat Nē Odug
(Matyu 12:1-8; Luk 6:1-5)*

²³ Sabat naa† taka bun, Jesus in dō fiya tar geid, wit kabī atu diyok dile fen, idi wit biya tunī fito difen.

²⁴ Age dife di, Farisia tamo idi Jesus dirokenen, “Ulef, ere nigin idi Sabat naa nē lo difodul ken, Sabat naa bun oug difef?”

²⁵ Jesus irokenēdin, “Sain Dawid, ne tā tar geid naū fedi di, saaf lau de fen, Dawid age fen anī, ā to uwesegen de?”

²⁶ Abiata, pris mudur ado ibodon sain anī bun, Dawid ĩ Negur nē fō namen ile fen, bret fateul prisem dogol dōdig‡ an ibodon anī yokon, ĩ bret tunī, ne tā tareg ifenēdin.”

²⁷ Age ye fen, ĩ idi irokenēdin, “Tamo isennēya nigin Sabat naa inon, tamom Sabat naa anī isennēf nigin to inon.

²⁸ Anī nigin, Tamo Naal ĩ Odug, Sabat nēg ĩ Odug.”

3

*Tamo Taka Ima Sitakā Gege Fefu Fiya
(Matyu 12:9-14; Luk 6:6-11)*

† 2:23: Sabat naa anī, juda neid uub nē naa. ‡ 2:26: Lo bun, bret fateul anī, prisem dogol dōdig.

¹ Sain taka, Jesus baban Juda neid uub fõ bun ilen. Tamo taka ima sitakã gege fefu fen anĩ, an ibodon.

² Tamo tunĩ an difaren idi, Jesus bouwa bun od dinouf nigin naab dimiren, anĩ nigin, idi ĩ Sabat naa bun tamo anĩ el fiyẽ mog, dilouf nigin ololo difen.

³ Jesus tamo ima fefu fiya anĩ irokenen, “Ganan meleid bun fã, ufar.”

⁴ Age ye fen, Jesus idi to fedin, “Nanĩ anĩ Sabat naa bun lo dõ fiya? Tobonunã biya age fiya anĩ de, tobonunã sane age fiya anĩ; isennẽ di, mata ibodõya anĩ de, yukesiya anĩ?” Anĩ ere, idi nin kẽ delen.

⁵ Jesus seye ye fen, idi fele fedin, idi waud togun nigin, ĩ wau odug gudũf fen, tamo anĩ irokenen, “Ogon imã yaĩ wo.” ĩ yaĩ fe di, in ima oditekei biya len.

⁶ Age fe di, kaisã bagai Farisia tamo idi kututũ deis dile, Herod nẽ dõ fiya tar weim, idi Jesus naig de dukesiyouf nigin od katõ difen.

Tamo Kayau Musei Jesus Dõ Difen

⁷ Jesus in dõ fiya tar geid, daliyoun disile di, tamo kayau musei Galili temeleid dõ difen.

⁸ Jesus ĩ ereb ereb ganan age fen anĩ karĩ de fen, tamo kayau musei Judia distrik, Jerusalem taun, Idumea distrik, Jordan naan kalilĩ fiya, Taia Saidon ado kalilĩ fiya adok, ĩ wagen disin.

⁹ Tamo kayau museim Jesus to sile difiyẽf nigin, ĩ yogon waag naal taka dodok de yenẽf nigin, in dõ fiya tar irokenẽdin.

¹⁰ Ere nigin, ï mogo musei el fedin. Anĩ nigin, idi dagi adodo Jesus kobũ fiya nigin abob susur difedin.

¹¹ Kaa sesen Jesus dilef sain ganan, idi ï wagen kuku de, den ken, diweig dirõdig, “Õ Negur Naal.”

¹² Anĩ ere, Jesus, ï aib anĩ, to wogõ douf nigin total bagai katũ fedin.

Jesus Aposel Tuwelf Igirnẽdin

(Matyu 10:1-4; Luk 6:12-16)

¹³ Jesus arei wala bun isel ibod ken, idi ï aib aib oron anĩ iweignẽdin. Age fe di, idi ï wagen disin.

¹⁴ Jesus ï tuwelf gei fen, aposel wowã douf nigin igirnẽdin, are idi Jesus geid fen, dum biya od wogõ douf nigin fau sur fediyouf,

¹⁵ idi total dale fen, kaa sesen dirudiyouf nigin age fen.

¹⁶ Jesus tuwelf igirnẽdin enidi, are Simon (Jesus ï yana yun Pita),

¹⁷ Jems Sebedi naal, tura Jon ado (Jesus idi yeneid yun Boaneges, anĩ nẽ gariya, Kolimei Gere Tar),

¹⁸ Endru, Filip, Batolomyu, Matyu, Tomas, Jems Alfeus naal, Tadeus, Simon Selot* taka,

¹⁹ Judas Iskariot, ï dum Jesus kiwai imeid bun inenen.

Jesus Belsebub Ado Difyen

(Matyu 12:22-32; Luk 11:14-23; 12:10)

²⁰ Jesus ï, fõ taka bun ile di, tamo kayau musei baban guru difen. Anĩ nigin, Jesus in dõ fiya tar geid, saaf yõya kisi feleya san.

* **3:18:** Juda neid kusĩ mala taka, idi Rom gawaman ado kusĩ dedig.

21 Jesus nē tura tar od anī karī de fen, idi ī dale diroulauf nigin dilen, ere nigin, idi diron, “Ī neneya kisi ado.”

22 Age dife di, lo ifelnēdiya tamo Jerusalem temeleid disi diron, “Ī Belsebub ado, ī kaa sesen neid mudur yana bunem, kaa sesen irudidig.”

23 Anī nigin, Jesus idi iweigneīd fen, yaab od nem irokenēdin, “Satan ī naig Satan iruwauf?”

24 Tano tekelei anī, yogo faraf, kiwai ifenēf are, tano anī to ifarauf.

25 Fō tekelei anī, yogo faraf, kiwai ifenēf are, fō anī to ifarauf.

26 Takag, Satan ī yogo faraf, kiwai ifenēf are, ī to ifarauf, in sain mogo bure felef.

27 Anī ere, taka nem tamo total ado nē fō bun safina gei fou fenē, tamo total ado ket ifokel fen, anī ī yogon fō bun bē yalouf.

28 Aya ā momoi arokeneik, tamo neid mosor ganan ado kono difef are, fau yalel kenēdiyouf.

29 Ani ere, aibem taka Awa Uur Fateul kono fiyek, in mosor to yalelauf, in mosor anī faimud ibodkalauf.”

30 Jesus od enī iron, ere nigin, idi dirōdig, “Ī kaa sane ado.”

Jesus Nē Sina, Tura Tar Geid
(*Matyu 12:46-50; Luk 8:19-21*)

31 Age ye di, Jesus nē sina, tura tar geid disin. Mayarē difar mā, idi Jesus dirokenēf nigin taka sur difen.

32 Tamo kayau musei ī salili difiyek dibodon, idi ī dirokenen, “Ogon sinā, turā tar geid, mayarē ō dimirnok.”

³³ Jesus to fedin, “Ai anĩ neu naai, neu turau tar?”

³⁴ Age ye fen, ĩ, salili difiyē dibodon idi lo feid fen, ĩ iron, “Enidi anĩ neu naai, neu turau tar!”

³⁵ Aib idi Negur nē oroya dō difedig anidi anĩ, neu turau, neu mainou, neu naai.”

4

Faat Irarāya Tamo Nē Yaab Od (*Matyu 13:1-23; Luk 8:4-15*)

¹ Jesus baban daliyou sirin, gariya ino, od ifelnēdin. Tamo kayau guru de, salili difiyen anĩ gai musei biya, anĩ nigin, tamo kayau adok ubun difar mog, ĩ waag taka daliyoun ifaren anĩ namen isil ibodon.

² Agef fen, erab erab musei yaab od nem ifelneĩd fen, iron,

³ “Karĩ gei! Kabĩ marau taka faat irarāf nigin ilen.

⁴ Sain ĩ irarak ile mog, tunĩ naab luwen kuku ren, are ninã disi dakasin.

⁵ Tunĩ meein tuar kuku ren, an teneub badagar. Are kaisā bagai fokū den, ere nigin, teneub are badagar bagai.

⁶ Anĩ ere, sain gaa ise di, bali are ilalaid, laasi yedin, ere nigin, idi warumutei sã.

⁷ Faat tunĩ malū duri atun kuku ren, are malū duri anĩ fã ye fen, sile feledin, anĩ nigin, biya to yun.

⁸ Faat tunĩ teneub biya bun kuku ren, are idi fokū yedin, oduduge di, biya imadin, taka biya teti, taka biya siksti, taka biya wan handred, age fef ilauf.”

⁹ Age ye fen, Jesus iron, “Taka ï karīya nigin weder ado, ï karī youf.”

¹⁰ Sain Jesus ï yogo ibod mog, yogon dō fiya tar tuwelf, tamo tunī salili difiyen anidi geid, yaab od nigin ï to difiyen.

¹¹ Jesus idi irokenēdin, “Negur tano nē waa are Negur mogo ifenein, anī ere, idi dumeitur onudi nigin, erēb erēb ganān yaab od bunem wogō yef,

¹² ere nigin,

“ ïdi meledim diledig, anī ere, idi meleid fokōya sã,
idi wederedim karī dedig, anī ere, idi gariya keleī sã.

Age fiya sãf are, idi waud falei de di, mosor yalel kenēdiyof.* ”

¹³ Age ye fen, Jesus idi irokenēdin, “Ā yaab od enī wauī to fokō youf? Age fiyauf are, naig fe di, ā yaab od tunī nigin wauī fokō youf?

¹⁴ Faat irarāya tamo, biya od irarak.

¹⁵ Tamo tunī idi faat naab luwen kuku ren gen, an biya od iraran. Idi karī de mog, kaisã bagai Satan isi, biya od idi namedin iraran anī yaleledig.

¹⁶ Tunī idi faat meein tuar iraran gen, idi od anī karī de fen, kaisã bagai dale fen, waud bun kulī dedig.

¹⁷ Anī ere, idi warumutei sã, anī nigin, idi sain meluk to dibodōf. Sain, biya od nigin, morō be kafī fiya be isif, idi kaisã bagai dirofosif.

¹⁸ Tunīg faat malū duri atun iraran gen, idi biya od karī den.

* **4:12:** Asaia 6:9, 10

19 Anĩ ere, tenebur mata ibodõya nẽ sii fiya, safina ado ibodõya nẽ kisi fiya, oroya fire fire isif anidim, biya od sile fe di, anim biya to yũf.

20 Tunĩ faat teneub biya bun iraran gen, idi biya od karĩ den, dale di, anĩ biya yũf, taka biya teti, taka biya siksti, taka biya wan handred, age fef ilauf.”

Lam Yoki Bun
(Luk 8:16-18)

21 Jesus idi irokenẽdin, “Ã lam urou usig, beĩ kuren be fatar farumen unogouf de? Age fiya ban, ã lam yogon yoki bun to useginnẽgouf de?”

22 Ereb ererb ganan iminẽyan yenek anĩ ganan yaor fouf, ererb ererb ganan nar fen yenek anĩ ganan irou isi, biru fel fen, yaau du fouf.

23 Taka ĩ karĩya nigin weder ado, ĩ karĩ youf.”

24 Jesus idi irokenẽdin, “Ã od karĩ gef anĩ, ed ge kisi gouf, ã idi nigin kisi gef gen, ã nigineg age de kisi difouf, anĩ tobol feneĩf.

25 Aib taka ĩ ado, wal fiya ifenẽf, aib taka ĩ sã, ererb ererb ĩ ado anĩg ĩ bun yalelauf.”

Faat Odugef Nẽ Yaab Od

26 Takag Jesus iron, “Negur nẽ tano are eig fiya gen, tamo taka teneub bun faat irarak.

27 Bõ ado gaa ado, tamo ĩ mulaĩ yenek, fã ye iyok, faat fokũ ye fen, odugef, anĩ ere, ĩ naig be fe odugef, ĩ keleĩ sã.

28 Teneub yogo dogol biya inodig, uyulil bali, age fe di, turu, anĩ turu bun biya inodig.

29 Biya bure fele di, kaisã bagai ĩ dimig gunõ willa ado inodig, ere nigin, biya yaleya sain isif.”

Masted Faat Nē Yaab Od
(*Matyu 13:31, 32, 34; Luk 13:18, 19*)

³⁰ Baban Jesus iron, “Negur nē tano, ere taka age fiya tauf? Ere bunem yaab tafouf?”

³¹ Ī masted faat age fiya. Ī faat memereis bagai ā teneub bun utenēgedig.

³² Anī ere, ĩ utenēge di, ĩ odugouf, ĩ kabier saaf ganan wal fediyouf, in beneir odudug irara ken, buri ino di, ninā ilun temeleid disi dibodōf.”

³³ Jesus yaab od age fediya musei bunem, tamo kayau idi keleī youf kisin, od wogō fiyēdin.

³⁴ Ī tamo kayau ereb od irokenēdiyou fenē, yaab od bunem dogol. Anī ere, ĩ mugu yogon dō fiya tar geidef are, ereb ereb ganan faded fedidig.

Jesus Yau Uyē Ado Irokenēdi Di, Kee Delen
(*Matyu 8:23-27; Luk 8:22-25*)

³⁵ Naa anī bun aragau di, Jesus in dō fiya tar irokenēdin, “Ada daliyou sitakā talauf.”

³⁶ Idi tamo kayau ditorneīd fen, Jesus waag bun ibod mog, idi ĩ dale dirou dilen. Waag tunīg weim dilen.

³⁷ Yau odug fā ye di, maaī fā ye, waag yu ken, maaī ifilege di, waag namen isokosen.

³⁸ Jesus ĩ, waagibun edē bun mulaī yen mog, idi ĩ turī difiyē dirokenen, “Tise, ada naanū talalau fenē, ō to kisi walef de?”

³⁹ Ī fā yen, yau sakā fiye ken, maaī irokenen, “Kee resig fen, dē weleg!” Age ye di, yau dē yele di, maaīg oditekei dē yelen.

⁴⁰ Jesus in dō fiya tar irokenēdin, “Ere nigin ā kumī wogef? Ā fau momoiya sā de?”

41 Idi fatuk bagai kumĩ tererẽ de fen, abob toti difen, “Eĩ aim bagai? Ì irõ di, yau maaĩ adog ait dõ difef!”

5

Jesus Tamo Taka Kaa Sesen Musei Ado El Fiyen (Matyu 8:28-34; Luk 8:26-39)

¹ Idi naan daliyou dibal dile, Gerasa teneub bun wõ den.

² Jesus waag bun tamal kutũ yesi di, tamo taka kaa sane ado, matmat bunem ì fotou fiyẽ fenẽ isin.

³ Tamo matmat bun ibodon anĩ, taka nem ì ifõya nigin kisi feleya sã, sen nemeg ifõya kisi feleya sã.

⁴ Ì sain musei sen nem, ye ima ado difofãdig, anĩ ere, ì sen kokour fel, yem ain weweur fedig. Taka nem totol ino fen, ì ifõ di, dẽ yeleya kisi feleya sã.

⁵ Sain ganan bõ ado gaa ado, ì matmat atun ado areineg iweig kaĩ ye fen, meinem yogo bouwa kokour fedig.

⁶ Ì mala irakelen, Jesus gerom ile fen, gudu ref ile, Jesus wagen kubũ ye, ibor bobou fen.

⁷ Ì ait odug nem iweig iron, “Õ aya ere naig wiyau fenẽ, Jesus, Negur Ilun Bagai nẽ Naal? Negur yana nem aya õ agonok, õ aya to daig wiyauf!”

⁸ Ere nigin, ì mogo kaa sane irokenen, “Õ tamo enĩ bun tamal ulõ weis!”

⁹ Age ye fen, Jesus ì to fiyen, “Õ yanã ai?”

Ì iron, “Aya yanau Ami, ere nigin, amã musei biya.”

¹⁰ Jesus idi akor anī bun tamal to irudiyouf nigin, ī baba baban Jesus igonen.

¹¹ Melsā arei wala sirin, bor musei biya saaf doko difaren.

¹² Kaa sesen Jesus digonen, “Amā bor atun susur wamāf, yo wamā di, idi namedin malalauf.”

¹³ Jesus idi yo fedi di, kaa sesen ulolō deis disel, bor namedin dilelen. Bor, tu tausen age fiya, gududu de, bebeig sane baurin daliyoun disil, naanū gare desin.

¹⁴ Bor lo fiya tamo diya dile, od anī taun ado fonō fonō wogō den. Age dife di, tamo kayau ereb wō yen anī dilou fenē dilen.

¹⁵ Sain idi Jesus garan wō den, idi meleid dirā, tamo kaa sesen museim dirounen anī, an garab yel, kisi biya ado ibod mog, dilen. Anī nigin, idi kumī den.

¹⁶ Tamo idi meledim dilen anidim, kaa sesenem tamo diroun anī ado bor age difen anī nigin, tamo kayau wogō difiyēdin.

¹⁷ Age dife di, tamo kayau, Jesus ī idi neid teneub anī itor ilauf nigin digonen.

¹⁸ Age de di, Jesus ī waag bun sō ye mog, tamo kaa sesenem dalen anī, Jesus ado dilauf nigin nonī fiyen.

¹⁹ Jesus ī to awa yokon irokenen, “Ō fonō ogon ibor tar gedin ulauf, Odug ō nigin age fen anī ado, ī naig fe fen, ō nigin wau yun anī, idi urokenēdiyof.”

²⁰ Age ye di, tamo anī itor ilen, Jesus ī nigin age

fen anī, Dekapolis* teneub bun tamo kayau wogō fiyēdi di, idi ganan terē den.

*Kayau Naal Laa Fen Ado Dagi Kayau Taka
(Matyu 9:18-26; Luk 8:40-56)*

²¹ Jesus baban waag bun ibal, naan daliyou sitakā ilen, ī daliyou yerin ibod mog, tamo kayau musei disi salili difiyen.

²² Age de mog, Juda neid uub fō lo fiya nē mudur taka, yana Jairus an isin. Ī Jesus ile fen, ī ye gariyan kubū yen.

²³ Ī igone ken, irokenen, “Nau barai naal oboim fef. Uma fen, imā teten uno di, ī biyal, matauf.”

²⁴ Anī nigin, Jesus ī uruwom dilen.

Tamo kayau musei dō difiyē, kitikiti de, susir difiyek dilen.

²⁵ Kayau taka idi atun an ifaren, ogō dagi faimud ado yar tuwelf iyon.

²⁶ Kayau anī dokta musei bun ilen, anī ere, bouwa bun morō odug idi bun yalen. Agef fen, yogon safina ganan irailen. Anī ere, kayau ī bouwa biya leya ban sane len.

²⁷ Sain kayau ī Jesus nigin karī yen, ī Jesus dume dōf, tamo kayau atu ile, in kolos kobū fen,

²⁸ ere nigin, kayau ī kisi fen, “Aya in gabar dogol kobū afouf, are deuf, aya fau biyauf.”

²⁹ Kaisā bagai, kayau naud segē yelen. Age fe di, kayau ī yogo bouwa bun karī yen, are karika len.

* **5:20:** Anī nē gariya, Ten Taun.

30 Kaisā bagai, Jesus in total ĩ bun tamal ul fe yale mog, karī yen. Ĩ tamo kayau atun falei yel, to fedin, “Aim neu kolos kobū fel?”

31 In dō fiya tar Jesus dirokenen, “Tamo kayau musei ō kiti diyok, ule fen anī, ō ‘Aim aya kobū fiyal?’ wof.”

32 Anī ere, Jesus ĩ aibem age fen anī ilouf nigin, fau fau fai yen.

33 Age fe di, kayau ĩ yogo ereb age fen kelei ken, Jesus wagen isi, ye gariyan kubū yen. Ĩ kumī tererē ye fen, momoi od ganan Jesus irokenen.

34 Jesus kayau irokenen, “Nau barai, ogon momoia anim el yom. Waū unois ule, dagi anim to ifōyōf.”

35 Jesus fau od wogō ye mog, tamo tunī, Juda neid uub fō lo fiya mudur Jairus nē fō bunem disin. Idi diron, “Nē barai mogo laa fel. Ere nigin ō tise fau morō wenek?”

36 Jesus od idi diron anī idod ken, Juda neid uub fō lo fiya mudur anī irokenen, “To kumī wo, momoi dogol wo.”

37 Jesus ĩ takam dō fediya nigin katū fedin, Pita, Jems, ne tura Jon idim dogol.

38 Idi Juda neid uub fō lo fiya mudur nē fō bun ulō deis fen, Jesus mala iran, tamo kayau waud gudūf fen, inā legur mog, iledin.

39 Jesus aaben ile fen, idi irokenēdin, “Ere nigin ā fatuk bagai inaī gef? Kayau naal ĩ laa fiya sā, ĩ mulā yenek.”

40 Anī ere, idi Jesus kasā difiyen.

Age dife di, Jesus idi irud le fen, ï kesu nē sina tama ado, in dō fiya tar geid, kesu yenen nē namen dilen.

⁴¹ Jesus ï imalē yalesne ken, irokenen, “Talita kum!” (anī nē gariya, “Kayau naal, aya ō arokonok, fā wo!”).

⁴² Kaisā bagai, kayau naal fā yale iyon (ï yar tuwelf ado). Anī nigin, idi oditekei terē den.

⁴³ Anī ere, taka to diro ken, karī youf nigin, Jesus total bagai katū fedin. Agef fen, ï kayau naal saaf difenē di, yāf nigin irokenēdin.

6

Profet Taka Fō Gariyan Yana Sā (Matyu 13:53-58; Luk 4:16-30)

¹ Jesus an itor ken, in dō fiya tar geid yogon fō gariyan dilen.

² Sabat naa wō ye di, Jesus Juda neid uub fō bun ifelnēdiya gariya inon. Age fe di, musei ï karī difiye ken, terē de diron,

“Tamo enī ereb ereb enei nain gei fen? Eï ere keleï anī ï ifenen? Anī bunem ï memelikeg inodig.

³ ï to kapenta de? ï to Maria naal fen, Jems, Josef, Judas, Simon ado tureid de? In main tar ada to ein weim de?” Age de fen, idi ï kiwai difenen.

⁴ Jesus idi irokenēdin, “Profet taka ï, in fō gariyan, in sirag atun ado, in fō bun dogol, ï yana sā.”

⁵ ï an memelik taka inoya kisi feleya sā, anī ere, ï dagi tamo teke tekelei dogol ima tetedin ino fen, el fedin.

⁶ Jesus idi neid momoiya to ile fen, terē yen.

*Jesus In Dō Fiya Tar Tuwelf Sur Fedin
(Matyu 10:5-15; Luk 9:1-6)*

Agef fen, Jesus fonō fonō iyo ken, od ifelnēdin.

⁷ Jesus tuwelf iweignēdi di, idi ī wagen disin. Ī uru uru, sur feid fen, kaa sesen dirudiyouf nigin, idi megeir ifenēdin.

⁸ Ī fadim yu ken, iron, “Delē uyōgouf nigin erēb taka to walogouf, bret sã, kodol sã, moni sã, manig dogol.

⁹ Sendel ufonūg fen, gabar ufilaīgef dogol, taka to walogouf.

¹⁰ Ereb sain ā fō bun ulagouf, an ubodōgef uleg, taun anī utorōgouf.

¹¹ Fonō taka bun ā to daleyēi ken, ā to karī diyeīf, sain ā fonō anī utorōg fen, yeī aas tu welege di, idi ā kiwai difenein anī keleīf.”

¹² Tamo kayau waud falei youf nigin, idi dile, od wogō den.

¹³ Idi kaa sesen musei diruid fen, tamo kayau dagi ado musei moul diguneīd, el difedin.

*Jon Naan Igunēdiya Tamo Ula Gudū Difen
(Matyu 14:1-12; Luk 9:7-9)*

¹⁴ King Herod Jesus nigin od karī yen, ere nigin, Jesus nē yana fō fō ganān karī den. Tunī diron, “Jon naan igunēdiya tamo, ī laa bun tamal kel fā yen, anī nigin, memelik nē total ī bun kabī yalef.”

¹⁵ Tunī diron, “Ī Eliya.”

Tunī diron, “Ī profet taka, profet kulu temeleid taka gen.”

16 Anĩ ere, sain Herod od enĩ karĩ ye fen, ĩ iron, “Jon, tamo anĩ ayam ula gudũ afen, ĩ laa fen anĩ kel fã yen!”

17 Ere nigin, kulu Herod ĩ irõ di, Jon dale difo ken, kalabus bun dinenen. Are Herod yogo tura Filip nẽ kayau Herodias yalen nigin,

18 Jon Herod irokenẽdig, “Õ turã nẽ kayau son won, are lo ufodulen.”

19 Herodias Jon nigin name sane fen, ĩ dukesiyouf nigin wau iron. Anĩ ere, ĩ kisi feleya sã,

20 ere nigin, Herod Jon kumĩ fiye ken, ĩ, Jon anĩ madur fateul tamo ye fen, kulatun fedig. Sain Herod ĩ Jon nẽ od karĩ yedig, ĩ wau togudig, anĩ ere, ĩ in od karĩya nigin orodig.

21 Dum sain biya wõ yen, Herod ĩ sina gõ fen anĩ nẽ naa bun, in kabĩ tamo odudug, in kusĩ mudur adodo, Galili teneub bun uyu irouya tamo anidi nigin tar inon.

22 Sain anĩ bun, Herodias nẽ barai isi, seg kui ye fen, dole di, Herod in tamo tar geid waud al fen.

Anĩ nigin, king kayau momoul irokenen, “Ereb taka nigin waũ iro ken, to wiyauf, are õ afonõf.”

23 Age ye fen, ĩ wau adok kuturol fen, kayau momoul irokenen, “Ereb taka nigin õ to wiyauf, aya neu tano anĩ fara af, uru afe fen, sitakã ifonõya kisin anĩ afonõf.”

24 Kayau momoul ile, sina irokenen, “Ere bagai nigin aya to afiyẽf?”

Sina iron, “Jon naan igunẽdiya tamo nẽ mudur nigin.”

²⁵ Ī kaisā bagai ile, king irokenen, “Aya gama bagai Jon naan igunēdiya tamo nē mudur, beī bun uno wanauf anī orouf.”

²⁶ King ĩ wau togun bagai, anī ere, in wau kuturol fen, tamo kayau meleid bun mogo iron nigin, ĩ kayau nē od yaleleya itoron.

²⁷ Anī nigin, king kaisā bagai ula gudū fedig kabī tamo, Jon nē mudur yale irou isiyouf nigin sur fiyen. Age fe di, ĩ ilen, kalabus bun Jon ula gudūf fen,

²⁸ mudur anī beī bun ino irou isin, kayau momoul ifenē di, ĩ bam yale, sina ifenen.

²⁹ Jon nē dō fiya tar anī karī de fen, disin, in bouwa dale, matmat bun mū difen.

Jesus Faiƒ Tausen Tamo Saaf Ifenēdin
(Matyu 14:13-21; Luk 9:10-17; Jon 6:1-14)

³⁰ Aposel idi Jesus wagen guru de fen, idi ereb age difen ado difelnēdin anī adok, wogō difiyen.

³¹ Age de mog, tamo kayau musei dilef disif difen, anī bunem, idi saaf yōya kisin san. Anī nigin, Jesus idi irokenēdin, “Ā aug dogol usig, aya geid talauf, modoū taka motikeleyan an si tanouf.”

³² Anī nigin, idi dogo dogol waag dale diya, moilin dilen.

³³ Anī ere, tamo kayau musei lo difeid mog, dilen nigin, idi nigin kelei ken, taun ganan bun temeleid idi yedim gududu de dile, idi ket an wowā den.

³⁴ Sain Jesus wō ye fen, mala iran, tamo kayau musei ileidin, ĩ idi nigin wau yun, ere nigin, idi sipsip marau sā gen. Anī nigin, ĩ ereb ereb musei idi ifelnēdin.

³⁵ Sain anī bun, gaa mogo kuru kelen, anī nigin, in dō fiya tar ī garan disi diron, “Eī gerere tuan, sain mogo sa kelel.

³⁶ Tamo kayau susur wodi di, dilauf, ago di, idi fonō kalilī fiya fonō fonō dile fen, dogo yōya nigin saaf na gei difouf.”

³⁷ Anī ere, ī aitedin yale iron, “Idi dāf nigin ereb āgem wenēdigouf.”

Idi ī dirokenen, “Tamo kayau musei nigin, saaf na yaleya moni odug biya. Ada tele, bret bun moni odug age fiya tara ken, tafenēdi di, dāf de?”

³⁸ Jesus idi irokenēdin, “Bret ganī ā ado? Uleg ulogouf.”

Idi kelei ken, Jesus dirokenen, “Bret faif, gau uru ado.”

³⁹ Age de di, Jesus, tamo kayau ganan, mala fire fire, fisir biya bun dibodadāf nigin, in dō fiya tar irokenēdin.

⁴⁰ Anī nigin, idi mala bun dibodadan, tunī wan handred, wan handred, tunī fifti, fifti.

⁴¹ Jesus bret faif gau uru ado yale, saa ilun itad fen, ī Negur de fiye ken, bret mumā fen. Agef fen, ī in dō fiya tar ifenēdin, tamo kayau wagedin dinodiyouf nigin. Ī gau urug agef tamo kayau atun foif ifenēdin.

⁴² Idi ganan don kisi felen.

⁴³ In dō fiya tar, tamo kayau bret gau ado dokon, tunī ditoraran anī fito difen, karam tuwelf isokosen.

⁴⁴ Faif tausen tamo anidim bret don.

*Jesus Naan Teteatu Iyon
(Matyu 14:22-33; Jon 6:15-21)*

⁴⁵ Kaisã bagai, Jesus, in dõ fiya tar waag bun, idi ketem Betsaida dilauf nigin, sur fedin. Agef fen, ã tamo kayaug irudin.

⁴⁶ Jesus idi itorneĩd fen, Negur kosẽ fiyẽf nigin arein iselen.

⁴⁷ Aragau mog, waag daliyou atun ifaren, anĩ ere, Jesus ã yogo mugu teneub bun.

⁴⁸ Jesus in dõ fiya tar total bagai ful dife mog, iledin, ere nigin, yau odug biya wewu fedin. Maur oboi wele ye mog, Jesus daliyou teteatu idi gedin iyok ilen. Ì wal fediyu fenẽ age fen.

⁴⁹ Anĩ ere, sain in dõ fiya tar meleid diran, Jesus daliyou teteatu iyõ mog, dile mã, idi kisi baraũ de fen, idi ui guri den,

⁵⁰ ere nigin, idi ganan ã dile fen, kumĩ tererẽ den.

Kaisã bagai, Jesus idi irokenẽdin, “Totol unog! Are ayam. To kumĩ wog.”

⁵¹ Age ye fen, ã idi gediyouf nigin waag bun sõ ye di, yau kee relen. Idi oditekei terẽ den,

⁵² ere nigin, idi bret bun waud to fokõ yen, idi neid waud katĩ felen.

*Jesus Genesaret Oun Dagi Adodo El Fedin
(Matyu 14:34-36)*

⁵³ Idi sitakã dibabal dale, Genesaret teneub bun wõ de fen, an waag difokel difaren.

⁵⁴ Idi waag bunem kututũ deis mog, tamo kayau enei Jesus yeya idi kelein.

⁵⁵ Idi Jesus an ibodok yeya karĩ def are, idi fonõ anĩ kalilĩ fiya adok gududu de fen, dagi tamo gabgab ado guri difedi di, disin.

⁵⁶ Sain ganan, modoũ fire fire bun, Jesus ilen, fonõ fonõ, taun tunĩ, taun dumeitur, tamo kayau idi maket modoũ bun dagi tamo dinenẽdin. Idi yogon gabar iri kobũ difouf nigin Jesus nonĩ difiyen. Ganan idi ã kobũ difen, dagi fara feledin.

7

Amuyẽ Sã Amuyẽ Ado (*Matyu 15:1-20*)

¹ Farisia tamo, lo ifelnẽdiya tamo tunĩ geid, Jerusalem temeleid disi guru de fen, Jesus salili difiyen.

² Idi lo difeid mog, in dõ fiya tar tunĩ amuyẽ ado imeid kulo fiya sã saaf don.

³ (Farisia tamo ado Juda tamo kayau ganan, saaf kaisã to dõdig. Idi imeid ket kulo difel fen, saaf dãf, ere nigin, idi mudur adodo biyeid neid tobonunã dõ difedig.)

⁴ Idi maket bun tamal ke douf, idi saaf kaisã to dãf, idi imeid kulo de fen bagai. Idi tobonunã musei tunĩg dõ difedig, kap, darum, ketel kulo fiya age fiya.)

⁵ Anĩ nigin, Farisia tamo, lo ifelnẽdiya tamo geid, Jesus to difiyen, “Ere nigin on dõ fiya tar, mudur adodo biyeid neid tobonunã to dõ de fen, amuyẽ ado imeid kulo fiya sã saaf dõdig?”

⁶ Jesus idi irokenẽdin, “Asaia ã, ã mala yaleya tamo nigin wogõ yen, in od tutuk, are eig ye itoton:

“Tamo kayau enidi neid sigoredim aya selu kulõ difedig,
anĩ ere, idi waud aya nigin gerõ ifaref.

⁷ Idi aya yanau dalesedig, are ege.

Idi tamo nē lo dogol anī difelnēdidig.’* ”

⁸ Jesus idi irokenēdin, “Ā Negur nē itāfiya utorōg fen, tamo nē tobonunā anī urougef.”

⁹ Age ye fen, ī idi irokenēdin, “Ā augeneī tobonunā dō fiya nigin ge fen, ā Negur nē itāfiya anī weleī sirin inoya keleī bagai!

¹⁰ Ere nigin, Moses iron, ‘Ō sinā tamā yeneid wales,’† ‘Aibem taka sina tama ado yeneid sane inouf, ī laa bun dineyēf.’‡

¹¹ Anī ere, ā urōgedig, tamo taka sina tama ado nigin irōf, ‘Ereb taka ā isenneīya nigin ayam ifeneīya, anī Koban’ (anī nē gariya, ‘ayam Negur afenem’),

¹² anī bunem, ā ī sina tama baban isennēdiya nigin katū wiyēgedig.

¹³ Anī nigin, tubuī tar neid tobonunā anī waleg uroug fen, Negur nē od tadū gedig. Agog fen, ā tobonunā fire fire musei ago gedig.”

¹⁴ Jesus baban tamo kayau iweignēdi di, wagen disi di, iron, “Ā adok aya karī wiyag, enei keleī youf.

¹⁵ Safina serē tamal tamo namen isilef anim, tamo amuyē to ifenēdig, anī ere, erab taka tamo namenem wō yef anim, ī amuyē ifenēdig.”§

¹⁷ Jesus tamo kayau itorneīd fen, fō bun ile di, in dō fiya tar, yaab od enī nigin ī to difiyen.

* **7:7:** Asaia 29:13 † **7:10:** Eksodas 20:12; Diuteronomi 5:16

‡ **7:10:** Eksodas 21:17; Levitikas 20:9 § **7:15:** Itotoya tunī eig de ditoton: *ifenēdig*. ¹⁶ *Taka ī karīya nigin weder ado, ī karī youf.*

18 Jesus idi irokenēdin, “Āg fatuk nene gef de? Ereb taka serē tamal tamo namen isiledig anim, amuyē to ifenēdig anī, ā to ulegedig de?”

19 Ere nigin, safīna are tamo wau bun to iledig, anī ere, te namen isiledig, anenem bou dōf isil, ulō yesidig.” (Age ye iron anī bunem, Jesus kurō feis, saaf ganam amuyē sā yen.)

20 Ī od tobol fe fen, iron, “Ereb tamo namenem ulō yesef anim, ĩ amuyē ifenēdig.

21 Ere nigin, tamo waud bunem kisi sesen wō yef, noli tobonunā, bē, tamo yukesiya, seseirā inoya,

22 neu mugu yeya, tobonunā sesen, idegēya, noli kisi, kiyeī, ne tā bou yūya, aya aya yeya, neneya tobonunā.

23 Tobonunā sesen enei ganam, tamo namen tamal ulō yesef anim, tamo amuyē ifenēdig.”

*Sirofonisia Kayau Taka Nē Momoiya
(Matyu 15:21-28)*

24 Jesus fonō anī itor ken, Taia* teneub bun ilen. Ī fō taka aaben ile fen, taka nem ĩ an ibodok yeya to keleī youf nigin wau iron. Anī ere, ĩ iminkel ibodōya nigin kisi feleya sā.

25 Agef mog, kayau taka Jesus nigin od karī yen, ĩ, ne barai kaa sanem irounen anī isi fen, Jesus ye gariyan kubū yen.

26 Kayau anī ĩ Grik† kayau, ĩ Siria nediwon Fonisia an sina gō fen. Ī, kaa sane, ne barai bun tamal iruwauf nigin Jesus nonī fiyen.

* 7:24: Taia are taun taka. † 7:26: Grik, idi ibor fire, Juda sā.

²⁷ Jesus kayau irokenen, “Kesu nanaal idi ereb orodif anī, idi ket dāf, ere nigin, kesu nanaal neid bret yale, gaũ irarakenēdiya, are to biya.”

²⁸ Kayau anī solof iron, “Odug, are momoi, anī ere, gaũ idig, tebol farumen kesu nanaal neid saaf momout kuku re di, dōdig.”

²⁹ Age ye di, Jesus kayau irokenen, “Ago solo urok nigin, ō ule, kaa sane, nē barai mogo itornem.”

³⁰ Age ye di, kayau fō bun ilen, kaa sane, ne barai itornen anī, fatarē yen mog, ilen.

Jesus Tamo Taka Weder Sigor Ado Ifofakeleya El Fiyen

³¹ Jesus Taia teneub itor ken, Saidon teneub atu ilen, Dekapolis‡ teneub bun wō ye fen, Galili maaĩwō isilen.

³² An tamo kayau, tamo taka weder daabu leya tutuk wogōya kisi feleya sã anī, Jesus wagen dirou disin. Idi tamo anī bun, ima teten inouf nigin Jesus nonī difiyen.

³³ Jesus, ĩ tamo kayau atun yale, firen irou ile fen, in ima gege, tamo anī nē weder kur inodin. Agef fen, Jesus salina ira ken, tamo anī nē bale kobū fen.

³⁴ Jesus saa ilun itad fen, si odug yale fen, ĩ irokenen, “Efata!” (anī nē gariya, “Fokō weid!”).

³⁵ Kaisã bagai, tamo nē weder fokō yedin, in bale karika le di, ĩ od atata fel wogō yen.

³⁶ Jesus, taka irokenēya nigin idi katū fiyēdin. ĩ baba baban irokenēdin, anī ere, musei wogō def dilen.

‡ 7:31: Anī nē gariya, Ten Taun.

³⁷ Tamo kayau idi odug biya terē de fen, idi diron, “Ī ereb ereb ganan biya dogol age fen. Ī age fe di, weder daabuya karī yef, sigor ifokeleya wogō yef.”

8

Jesus Fo Tausen Tamo Saaf Ifenēdin (Matyu 15:32-39)

¹ Sain anī bun, baban tamo kayau musei guru difen. Idi ereb taka yōya nigin san, anī nigin, Jesus in dō fiya tar ĩ garan iweig laisi fen, iro-kenēdin,

² “Aya tamo kayau enidi waud inaf, idi mogo aya geid, naa towo ereb taka yōya sã.

³ Aya idi naū ado fonō susur afouf are, idi luwen kuku douf, ere nigin, idi tunī egerō temeleid disin.”

⁴ In dō fiya tar aiten dale, Jesus dirokenen, “Gerere tuan eig fiya, taka nem bret kisi feleya nain yale fen, idi ifenēdiyof?”

⁵ Jesus to fedin, “Bret ganī ã ado?”

Idi diron, “Sewen dogol.”

⁶ Jesus tamo kayau tenebur dibodadāf nigin irokenēdin. Agef fen, Jesus bret sewen geif iron, ĩ Negur de fiye ken, bret anī mumã feid fen, tamo kayau wagedin dinouf nigin, in dō fiya tar ifenēdi di, idi age difen.

⁷ Idi gau nanaaleg teke tekelei adon. Ī gau anidi nigineg Negur de fiye ken, idi gadō difediyof nigin in dō fiya tar irokenēdin.

⁸ Tamo kayau don kisi felen. Dum in dō fiya tar, tamo kayau bret dokon, tunĩ ditoraran anĩ fito difen, karam sewen isokosen.

⁹ Tamo fo tausen age fiya an difaren. Anĩ Jesus idi, nedi fonō fonō sur fedī di, ke de dilen.

¹⁰ Agef fen, Jesus in dō fiya tar geid, waag bun sosō de fen, Dalmanuta distrik dilen.

*Farisia Tamo Saa Ilun Nē Uris Nigin To Difen
(Matyu 16:1-4)*

¹¹ Farisia tamo disī, Jesus kisi difiye ken, saa ilun nē uris dilouf nigin to difiyen.

¹² Ī si odug yale fen, iron, “Ere nigin tamo kayau sain enĩ bun difaref eneidi, uris nigin aya to difiyaf? Aya ã momoi arokeneik, uris taka idi to dalouf.”

¹³ Age ye fen, ĩ idi itorneĩd, waag bun kel sō ye, maaĩ sitakā ibal ilen.

*Farisia Tamo Geid Herod Geneid Yis
(Matyu 16:5-12)*

¹⁴ In dō fiya tar bret taka to dalen, wedereid tu kelen. Bret tekelei dogol waag bun idi adon.

¹⁵ Jesus idi wedereid iron, “Ā, Farisia tamo geid Herod geneid yis nigin lo welegei.”

¹⁶ In dō fiya tar idi dogo dogol katō de fen, diron, “Ada bret sã nigin age yel.”

¹⁷ Idi neid wogōya Jesus kelei ken, idi to fedin, “Ere nigin ã bret to urougel nigin wogō gef? Ā fau ileyã sã, wedereĩ fokōya sã de? Āgenei wauĩ total bagai lef de?”

18 Æ meleĩ ado, anĩ ere, ã to ulegedig de? Æ wedereĩ ado, anĩ ere, ã to karĩ gedig de? Æ to karĩ welegef de?

19 Sain aya bret faif, faif tausen tamo nigin mumã afen, ã karam ganĩ bun, bret tunĩ kuru ge di, isokosen?”

Idi aiten dalen, “Karam tuwelf.”

20 “Sain aya bret sewen, fo tausen tamo nigin mumã afen, ã karam ganĩ bun, bret tunĩ kuru ge di, isokosen?”

Idi aiten dalen, “Karam sewen.”

21 Jesus idi irokenēdin, “Æ fau to kisi fokō yef de?”

Tamo Taka Mala Ifofakeleya Oun Betsaida El Fiyen

22 Idi Betsaida disin. An tamo kayau tunĩ, tamo taka mala ifofakeleya diroule fen, Jesus imam kobũ fiyēf nigin nonĩ difiyen.

23 Jesus, tamo mala ifofakeleya ima yale, sibof, fonõ dumeitur dilen. Agef fen, ã tamo mala bun salina ira ken, ima tamo mala bun ino fen, to fiyen, “Ere tau ulef?”

24 Æ mala fara fel fen, iron, “Aya tamo kayau ailedif, idi aa gegen diyokesif.”

25 Jesus baban in ima, tamo mala bun inon. Age fe di, tamo mala fara fele di, tutuk kelē yelen. Ereb ereb ganan ã yaor iledin.

26 Jesus tamo anĩ in fõ bun sur fiye ken, irokenen, “Fonõ atu to ulauf.”

*Pita Kristus Nigin Kurõ Fesin
(Matyu 16:13-20; Luk 9:18-21)*

²⁷ Jesus in dō fiya tar geid, Sisaria Filipai nediwon fonō fonō diyok dilen. Naabur ī to fedin, “Tamo kayau idi, aya nigin ai dedig?”

²⁸ Idi diron, “Tunī dirok, Jon naan igunēdiya tamo; tunī dirok, Eliya; tunī dirok, profet anidi taka.”

²⁹ Jesus to fedin, “Ba ā uleg? Aya nigin ā ai gef?”

Pita aiten yale iron, “Ō anī Kristus.”

³⁰ Age ye di, Jesus ī nigin taka to dirokenēf nigin, idi wedereid iron.

Jesus In Laa Nigin Iron

(Matyu 16:21-28; Luk 9:22-27)

³¹ Age ye fen, Jesus gariya ino, idi ifelneīd fen, irokenēdin, Tamo Naal ī, darau musei yale fen, mudur adodo, pris odudug, lo ifelnēdiya tamo idim dudum difiyēf. Age de fen, ī dukesi di, naa towo bure fele di, kel fā youf.

³² Jesus od anī kurō fesi di, Pita Jesus yale, yerin iron ile, ou fiyen.

³³ Age fe di, Jesus falei yel, in dō fiya tar lo feid fen, ī Pita ou fiyen. Ī iron, “Satan! Dumeun ule. On kisi are Negur nē sā, on kisi tamo nē dogol.”

³⁴ Age ye fen, Jesus, tamo kayau in dō fiya tar geid iweigneīd fen, irokenēdin, “Aib taka aya dō fiyau fenē, ī yogon oroya lai fesil fen, yogon aa tetek faali fe, aya dō fiyauf.

³⁵ Ere nigin, aib taka yogon bouwa buru mata ibodōf nigin oro fef, are fō yalauf, anī ere, aib taka yogon mata bouwa buru, aya nigin ado biya od nigin ye fen, irailauf, are kel yalouf.

³⁶ Tamo taka ï, teneub enĩ ganan kakarai fe, akorou ye fen, in malakanon irailauf, ere biya ï yalouf?

³⁷ Takag, tamo taka, yogon malakanon nigin ere mala solof fen, ï kel yalouf?

³⁸ Aib taka, seseirã inoya,* mosor inoya nẽ tamo kayau eneidi bun, aya nigin ado neu od nigin mama fouf are, sain Tamo Naal in engel fateul geid, Tama nẽ fula fiya medeïya ado disiyouf bun, ïg ï nigin mama fouf.”

9

¹ Age ye fen, ï idi irokenẽdin, “Aya ã momoi arokeneik, tunĩ ein difaref, fau to gare de mog, idi Negur nẽ tano* megeir ado isi mog, dilouf.”

Jesus Bouwa Falei Felen (*Matyu 17:1-13; Luk 9:28-36*)

² Naa sigis bure fele di, Jesus, Pita, Jems, Jon anidi geif fen, idi mugu arei odug ilun diselen. An Jesus idi meleid bun bouwa falei felen. ³ In kolos lalau medeïya bagai, lalau anĩ tenebur ein taka nem kulo fe di, agef filiya kisi feleya sã.

⁴ Agef mog, an idi meleid bun, Moses Eliya ado wowã de fen, Jesus weim wogõ den.

⁵ Pita Jesus irokenen, “Rabi,† ada ein ibodõya nigin biya bagai. Ada salafat towo tanouf, taka ogon, taka Moses nẽ, taka Eliya nẽ.”

* **8:38:** Seseirã inoya, anĩ nẽ gariya ein, Negur fotokar waitou fire fire nigin momoiya. * **9:1:** Negur nẽ tano an, Negur yogo ereb ereb ganan lo fef. † **9:5:** Rabi, anĩ nẽ gariya, Juda neid tise.

⁶ (Ī wogōya tata fen, ere nigin, idi fatuk bagai kumĩ den.)

⁷ Agef mog, lalo isi, idi kerub feid fen, ait taka lalo bunem wō yen, “Eĩ neu Kesu, ĩ nigin aya wau laa fedig. Ī karĩ wiyēg!”

⁸ Kaisā bagai, idi fai den, aib taka to weim difar mog, dilen, Jesus dogol.

⁹ Idi arei nem diyok disi fen, Jesus ereb idi dilen anĩ, Tamo Naal laa bun tamal fau fāya sã mog, taka to dirokenēf nigin, idi katũ fedin.

¹⁰ Idi od anĩ dogo bun dogol ibod ken, ‘laa bun tamal kel fāya’ anĩ nē gariya nigin katō difen.

¹¹ Age de fen, idi Jesus to difiyen, “Ere nigin lo ifelnēdiya tamo, ‘Eliya ĩ ket uyu isi di, Mesia isiyouf,’ dedig?”

¹² Jesus aitedin yalen, “Momoi bagai, Eliya ket uyu isi fen, ereb ereb ganan madur fedif. Anĩ ere, ere nigin Tamo Naal ĩ darau musei yale fen, dudum difiyēf anĩ, Negur nē Itotoya bun ibodok?”

¹³ Anĩ ere, aya ã arokeneik, Eliya mogo isin, ĩ nigin Negur nē Itotoya bun yenek gen, ereb ereb ganan idi waud iron, ĩ nigin mogo age difen.”

*Jesus Kesu Kaa Sane Ado El Fiyen
(Matyu 17:14-21; Luk 9:37-43)*

¹⁴ Sain idi, in dō fiya tar tunĩ ganan geredin disi fen, tamo kayau musei, idi salili difiyeĩd fen, lo ifelnēdiya tamo geid, od nem abob fe fe de mog, diledin.

¹⁵ Kaisā bagai, tamo kayau ganan Jesus isi mog, dile fen, idi fatuk bagai terē den, aan difiyēf nigin gududu de dilen.

16 Jesus idi to fiyēdin, “Ã ere nigin idi geid, od nem abob fe fe gef?”

17 Guru fiya atun, tamo takam aiten yale iron, “Tise, aya neu kesu, õ gein arou asil, ï kaa sanem irou di, ait ifokelen.

18 Sain ganan kaa sanem irouf, ï yũ irã di, tenebur kubũ ye, sali mokuf, gobora kikokõ ye fen, bouwa teregein yedig. Aya on dõ fiya tar kaa sane diruwauf nigin to afedin, anĩ ere, idi kisi feleya sã.”

19 Jesus solof iron, “Tamo kayau eneidi momoia sã, sain ganĩ aya ã geid tabodõf? Sain ganĩ aya ã nigin wau aukesilauf? Kesu wageun urousig.”

20 Age ye di, idi kesu anĩ, ï garan dirou disidi, kaa sane Jesus ile fen, kaisã bagai kesu yũ iran. Kesu ï tenebur kubũ ye, wele yef, yen ken, awa bun sali moku fen.

21 Jesus kesu nẽ tama to fiyen, “Sain ganĩ ï eig fiya ibodon?”

Ï aiten yale iron, “Ï kesu naalun gariya inon.

22 Sain musei, ï yukesiyou fenẽ nigin yã bun ado naanũ irãdig. Anĩ ere, õ ereb taka age fiya nigin kisi feleyauf are, amã nigin waũ ino ken, usennamã.”

23 Jesus ï irokenen, “ ‘Õ kisi feleyauf,’ wof de? Taka ï momoi youf, ereb ereb ganan age fiya nigin kisi feleya.”

24 Kaisã bagai, kesu nẽ tama iweig iron, “Aya momoi auf, neu momoia naal nigin usenna!”

25 Age ye di, tamo kayau gududu de disidi mog, anĩ Jesus ileid fen, ï kaa sane ou fiyen. Ï iron, “Õ

daabuya ait ifokeleya kaa, aya ò arokonok, ï bun tamal ulõ weis fen, baban ï namen to kel ulauf.”

²⁶ Kaa anĩ ui ye fen, kesu yũ irã di, fatuk bagai tererẽ ye mog, ulõ yeis ilen. Lo difen, kesu laa gen yenẽ di, musei diron, “Ï laa fel.”

²⁷ Anĩ ere, Jesus kesu anĩ ima irou fen, yalesnẽ di, ï ifaren.

²⁸ Jesus ï aaben ile ibod mog, in dõ fiya tar mugun ï to difiyen, “Ere nigin amã kaa sane iruya nigin kisi feleya san?”

²⁹ Age de di, ï irokenẽdin, “Eig fiya are, Negur kosẽ fiyẽya‡ bunem dogol iyawauf.”

*Jesus Baban In Laa Nigin Iron
(Matyu 17:22, 23; Luk 9:43-45)*

³⁰ Idi modoũ anĩ ditor ken, Galili distrik atu diyok dilen. Taka nem idi an yeya kariya nigin, Jesus to oron,

³¹ ere nigin, ï in dõ fiya tar ifelnẽdin. Ï idi irokenẽdin, “Tamo Naal ï, fau kiwai tamo imeid bun dinouf. Idi fau ï dukesiyouf, naa towo bure fele di, ï fau kel fã youf.”

³² Anĩ ere, idi od enĩ nẽ gariya nene de fen, ï to fiya nigin kumĩ den.

*Ai Anĩ Odug Bagai?
(Matyu 18:1-5; Luk 9:46-48)*

³³ Idi Kapenaum taun disin. Jesus fõ bun ibod ken, ï idi to fedin, “Ã naabur ere luwa urougel?”

³⁴ Anĩ ere, idi foro firi delen, ere nigin, naab luwen, aim anĩ idi atun odug bagai ibodok nigin luwa diroun.

‡ 9:29: Itotoya tunĩ eig de ditoton: *kosẽ fiyẽya ado kuriya.*

³⁵ Jesus ibod ken, in dō fiya tar tuwelf iweig laisi fen, iron, “Taka ï uyu ifarau fenēf, ï gai dumen bagai youf. Agef fen, ï ganan neid kabī tamouf.”

³⁶ ï kesu naal taka yale iroule, idi atun ifarnen. ï imam yale koboi fiye ken, ï idi irokenēdin,

³⁷ “Aib taka aya yanau bunem, kesu naal eig fiya taka yalef are, ï aya yaleyaf. Aib taka ï aya yaleyaf are, ï aya dogol to yaleyaf, ï aya sur fiyan anīg yalef.”

*Taka ï Ada Nigin Kiwai To Inof, Are Neda
(Luk 9:49, 50)*

³⁸ Jon iron, “Tise, tamo taka, õ yanã nem kaa sesen iruid mog, amã mailen. Anĩ nigin, amã ï katũ mafiyen, ere nigin, ï neda takam sã.”

³⁹ Anĩ ere, Jesus iron, “To katũ wiyēg, taka ï neu yanau nem memelik inof are, ï kaisã bagai aya nigin sane irõya kisi feleya sã,

⁴⁰ ere nigin, taka ï ada nigin kiwai to inof, are neda.

⁴¹ Aya ã momoi arokeneik, taka ï, aya yanau nem, ã Kristus nē nigin ye fen, kap naan ado ifeneĩf are, ï in mala solo momoi bagai yalouf.

*Mosor Bun Ineyēf
(Matyu 18:6-9; Luk 17:1, 2)*

⁴² “Aibem taka age fe di, kesu aya nigin momoi def enidi taka, mosor bun ineyēf are, tamo anĩ meein odug guyutu bun ifo ken, maaĩwõ irāyam, are dem.

⁴³ Ogon imam mosor bun ineyōf, gudũ wol. Õ imã tobega ado, mata bun ileya nigin biya bagai,

ere nigin, ima totoũ adouf are, hel bun an yã faimud ibodkeleyan uleya nigin. §

⁴⁵ Age fiya gen, ogon yẽ anim, mosor bun ineyõf, gudũ wol. Õ yẽ tobega ado mata bun ileya nigin biya bagai, ere nigin, yẽ totoũ adouf are, hel bun dirãyoõf.*

⁴⁷ Takag, ogon malã anim, mosor bun ineyõf, ubodol uraile. Õ malã tekelei ado Negur nẽ tano bun ileya nigin biya bagai, ere nigin, malã totoũ adouf are, hel bun dirãyoõf,

⁴⁸ an
“idi neid mamat to gare dedig,
yãg to gare feledig.”†

⁴⁹ Tamo ganan, yã tetedin sol gen tu difouf.

⁵⁰ “Sol ã biya, anã ere, in kai sa kalauf, naig wo di, baban kai youf? ã aug bun sol adouf, agog fen, abob nigin wau inosiya bun ubodõgouf.”

10

Tamo Kayau Ado Bagu Fiya Anã Fara Fiya (Matyu 19:1-12; Luk 16:18)

¹ Jesus modoũ anã itor ken, Judia distrik nẽ akor anã atu ile, Jordan naan sitakã ilen. Baban tamo kayau mala odug ã wagen disi di, ã gai age fedig gen, od ifelnẽdin.

² Farisia tamo tunã disi, kisi difiye ken, to difiyen, “Tamo taka yogon kayau iruf anã, are lo dõ fiya de?”

§ **9:43:** Itotoya tunã eig de ditoton: *nigin*, ⁴⁴ *an idi neid mamat to gare dedig, yãg to gare feledig.* * **9:45:** Itotoya tunã eig de ditoton: *dirãyoõf*, ⁴⁶ *an idi neid mamat to gare dedig, yãg to gare feledig.*

† **9:48:** Asaia 66:24

³ Ī aitedin yale iron, “Moses, anī nigin ere od wogō yein?”

⁴ Idi diron, “Moses yo yen, are tamo bagu fiya anī fara fiya pepa itot fen, kayau od sã iru di, ilauf, yen.”

⁵ Jesus idi irokenēdin, “Moses lo anī itotkenein, ere nigin, āgenei wauī total bagai agef yeneīd.

⁶ Anī ere, gariya bun Negur erēb erēb ino fen, ‘tamo ino, kayau ino fen.’*

⁷ ‘Age fiya nigin, tamo ĩ in sina tama itorneīd fen, in kayau ado bagu difouf,

⁸ age fe di, idi uruwom bouweid tekelei youf.’† Age dife di, idi uru sã, idi tekelei.

⁹ Anī nigin, erēb Negur bagu fedin anī, tamom to fara fouf.”

¹⁰ Sain idi baban fō bun dibod ken, in dō fiya tar od enī nigin Jesus to difiyen.

¹¹ Jesus idi irokenēdin, “Aib taka in kayau iru fen, kayau taka yalouf, ĩ kayau tubu morō ifen ken, seseirã inouf.

¹² Age fiya bagai, kayau taka in aiwa itorne ken, tamo taka yalouf are, ĩ seseirã inouf.”

Kesu Nanaal Jesus Geid

(Matyu 19:13-15; Luk 18:15-17)

¹³ Tamo kayau, kesu nanaal Jesus wagen kobū fediyouf nigin guri difeid disin, anī ere, in dō fiya tar, idi ou difiyēdin.

¹⁴ Jesus anī ile fen, wau sanen. Ī idi irokenēdin, “Utornēdig len, kesu nanaal aya wageun disiyouf,

* **10:6:** Jenesis 1:27 † **10:8:** Jenesis 2:24

idi to katũ wedig, ere nigin, Negur nẽ tano are eig fediya neid.

¹⁵ Aya ã momoi arokeneik, aib taka ã, Negur nẽ tano kesu naal age fiya gen to yalouf are, ã namen to bagai ilauf.”

¹⁶ Age ye fen, ã kesu nanaal koboi feid fen, in ima tetedin ino fen, el fiya ifenẽdin.

Tamo Gaũ Safina Musei Ado
(*Matyu 19:16-30; Luk 18:18-30*)

¹⁷ Jesus mogo naab iyok ile mog, tamo taka ã garan gudu ref isel, wagen kubũ ye, ibor bobou fe fen, ã to fiyen, “Tise biya, aya ere naig afouf anĩ, mata faimud ibodkeleya alouf?”

¹⁸ Jesus ã irokenen, “Ere nigin õ aya anĩ biya wiyaf? Aibem taka biya sã, Negur yogo dogol.

¹⁹ Õ ãtãfiya keleĩ: ‘Õ tamo taka to ukesiyouf, õ to seseirã unouf, õ to bẽ walouf, õ taka nigin idegẽya od to urõf, õ idegẽya bunem safina to walouf, sinã tamã sigoreid dõ wouf.’‡ ”

²⁰ ã Jesus irokenen, “Tise, enei ganan, aya kesu naalun dõ afef asin.”

²¹ Jesus ã lof ile, ã nigin wau laaf fen, iron, “Tekelei anĩ õ inĩ sã. Ule, ogon safina ganan na nigin sur wo fen, maleg tamo weneĩd, agouf anĩ, õ saa ilun safina biya adouf. Ago wol fen, usi, aya dõ wiya.”

²² Od anĩ bunem, nawa kuru kele fen. ã wau morõ ado ilen, ere nigin, ã safina musei ado.

‡ **10:19:** Eksodas 20:12-16; Diuteronomi 5:16-20

²³ Jesus falei yel fen, in dō fiya tar irokenēdin, “Safina musei ado tamo, Negur nē tano bun ileyā nigin gai malai bagai!”

²⁴ In dō fiya tar, in od anī nigin terē den. Anī ere, Jesus baban iron, “Nau kesu tar, Negur nē tano bun ileyā nigin gai malai bagai!”

²⁵ Kamel ī gabar iwaya nil ku bun ileyā nigin karika bagai, safina musei ado tamo Negur nē tano bun ileyā nigin malai bagai.”

²⁶ Od anī bun, in dō fiya tar fatuk bagai terē de fen, abob toti difen, “Age fiyauf are, aim anī mata ibodkeleya yaleyā kisi feleya?”

²⁷ Jesus idi lo feid fen, iron, “Tamo bun are kisi feleya sã, anī ere, Negur bun kisi feleya. Ereb ereb ganān Negur bun kisi feleya.”

²⁸ Pita Jesus irokenen, “Amã ereb ereb ganān mator ken, ō dō mayok!”

²⁹ Jesus solof iron, “Aya ã momoi arokeneik, aib taka fō, tura tar, main tar, sina, tama, gere tar be, kabī, aya nigin ado biya od nigin itoron,

³⁰ ī mala solo wan handred wal fiya, sain enī bun, (fō, tura tar, main tar, sina tar, gere tar, kabī anidi ado morōg) yalouf, ī dumen isiyouf buneg mata faimud ibodkeleya yalouf.

³¹ Anī ere, musei malabag dibodok, idi dumen dibodōf; musei dumen dibodok, idi malabag dibodōf.”

*Jesus In Laa Nigin Irō, Towo Fen
(Matyu 20:17-19; Luk 18:31-34)*

³² Jesus uyu irou fen, idi Jerusalem naab diselen. Age fe dī, in dō fiya tar idi terē de mog, idi dō difedin anī kumī den. Baban Jesus in dō fiya tar

tuwelf firen gou feid fen, ï fau bouwa bun ere wõ youf anï irokenēdin.

³³ Jesus iron, “Ada Jerusalem teselef, an Tamo Naal ï pris odudug, lo ifelnēdiya tamo imeid bun dinenēf. Idi ï laa fouf nigin bouwa bun od dūf. Age de fen, idi ï haiden Juda sã anidi imeid bun dino di,

³⁴ idi ketē difiyēf, disisnēf, wagĩ difiye ken, dukesiyouf. Naa towo bure fele di, ï kel fã youf.”

*Jems Jon Ado Neid To Fiya
(Matyu 20:20-28)*

³⁵ Sebedi gere tar, Jems Jon ado, Jesus wagen disin. Idi diron, “Tise, amã ereb taka nigin to mafe di, õ agouf anï oromak.”

³⁶ Jesus idi irokenēdin, “Ã ere anï, aya age afeneif nigin oroyeik?”

³⁷ Idi aiten dale diron, “Ogon fula fiya medeïya bun, amã taka ogon ima biyalē ibodõ di, taka ogon ima kilē ibodõf anï oromak.”

³⁸ Jesus idi irokenēdin, “Ã ereb to gef anï nē gariya ã keleĩ sã, aya naan ãf anï, ã yõya kisi feleya de? Agef mã, naan aya agũf anï, ã igũya kisi feleya de?”

³⁹ Idi aiten dale diron, “Amã kisi feleya.” Age de di, Jesus idi irokenēdin, “Naan aya ãf are, ã wãgauf, naan aya agũf are, ã ugũgouf,

⁴⁰ anï ere, imau biyalē ibodõya, kilē ibodõya are, ayam ifenēya kisi feleya sã. Modou anidi are, idi nigin saika fen anidi neid.”

⁴¹ In dõ fiya tar ten od anï karĩ de fen, Jems Jon ado nigin seye den.

⁴² Jesus idi iweig laisi fen, iron, “Ã kelei, haiden neid uyu irouya def anĩ, tamo kayau lo fiya nigin totol dinodig, idi dogo neid odudug, idi aruneid dalouf nigin megeir dinodig.

⁴³ Ã bun kisi to agef yenēf, ã atun, aib taka odug ibodōf nigin orof, ĩ ãgenei kabĩ tamo ibodōf.

⁴⁴ Aib taka uyun ibodōf nigin orof, ĩ ganan neid ferfer ouf.

⁴⁵ Ere nigin, Tamo Naal ĩg disennēf nigin to isin, anĩ ere, ĩ tamo kayau isenneid fen, tamo kayau musei idi neid mosor anĩ fotokar, yogon mata ifenēdiyof nigin isin.”

*Bartimeus Mala Ifofakelen Anĩ Mala Fara Felen
(Matyu 20:29-34; Luk 18:35-43)*

⁴⁶ Age de fen, idi Jeriko disin. Jesus, in dō fiya tar, tamo kayau mala odug geid, taun anĩ ditor dile mã, tamo taka mala ifofakeleya, Bartimeus (Timeus naal), ĩ naab yerin nonĩ yef ibodon.

⁴⁷ Sain ĩ Jesus Nasaret tamal yeya anĩ karĩ ye fen, ĩ iweig iron, “Jesus, Dawid Naal, aya nigin malalon yō!”

⁴⁸ Age ye di, tamo musei sakã difiye ken, foro yalauf nigin dirokenen, anĩ ere, ĩ wade bagai iweig iron, “Dawid Naal, aya nigin malalon yō!”

⁴⁹ Jesus dē yel fen, iron, “Uweignēg.” Age ye di, idi tamo mala ifofakeleya diweignen, “Waũ el fe fen, fã wale! ĩ õ iweignok.”

⁵⁰ Age de di, ĩ yogon gabar sirilē iraile fen, fã yale, Jesus wagen isin.

⁵¹ Jesus ĩ to fiyen, “Aya õ ere age afonōf ani, õ oroyok?”

Tamo mala ifofakeleya iron, “Rabi, aya kelē au fenē.”

⁵² Jesus iron, “Ule, ogon momoiya anim el yom.” Kaisā bagai, ī kelē yel fen, Jesus dōf, naab dilen.

11

Jesus Tamo Yana Ado Gen Jerusalem Namen Ilen

(Matyu 21:1-11; Luk 19:28-40; Jon 12:12-19)

¹ Idi Jerusalem kelē difiye ken, Moul Arei* bun Betfage Betani ado wō den, Jesus in dō fiya tar uru sur feid fen,

² Ī idi irokenēdin, “Fonō wageik anī bun uleg, an wōg fen, donki naal difon anī ulogouf, are aibem taka anī bun to iyon. Anī biru weleg fen, ein urou usig.

³ Taka nem to yeif, ‘Ere nigin ā enī ago gef?’ youf are, urokenēgouf, ‘Odug orof nigin, fau mogo kaisā ein kel sur fouf.’ ”

⁴ Idi dile, donki naal naabur bobog ileyan difokelen ifar mog, fotou difen. Idi biru de mog,

⁵ tamo tunī an difaren anidim to difedin, “Ā ere naig gouf nigin, donki naal anī biru gef?”

⁶ Idi Jesus irokenēdin kilei, solo de dirokenēdin. Age de di, tamo ditornēdi di, dilen.

⁷ Idi donki naal anī Jesus wagen dirousi fen, idi neid gabar teten dirarā di, ī anī teten ibodon.

⁸ Tamo kayau musei, idi neid gabar naabur du difedin, age de mog, tunī idi kabier aa were aarau ado kokour difedin anī du difedin.

* **11:1:** ‘Oliv Arei’ dedig.

9 Tamo kayau uyu dilen ado dume dō difen, kakaĩ de diron,

“Hosiana!†”

“Odug yana bunem isif, are ã el fiyek!”‡

10 “Neda tamada Dawid nē tano isif, are el fiyek!”

“Hosiana, ilun bagai!”

11 Jesus Jerusalem wō ye fen, tempel ilen. Ñ ereb ereb ganan kii fedin, anñ ere, sain bure felen nigin, ñ in dō fiya tar tuwelf geid Betani dilen.

Jesus Aa Fig Isisnen

(Matyu 21:18, 19)

12 We fele di, idi Betani ditor dile fen, Jesus nañ fen.

13 Ñ mala ira kel, aa fig aarau ile fen, ñ faat ado be ye mā, ilouf nigin ilen. Ñ non ilen, faat taka to ilen, aarau dogol, ere nigin, imaya sain sã.

14 Age fiya ile fen, ñ aa irokenen, “Taka nem ò bun faat baban to yãf.” Agef irō mog, in dō fiya tar karĩ den.

Jesus Tempel Waĩ Fen

(Matyu 21:12-17; Luk 19:45-48; Jon 2:13-16)

15 Jerusalem wō de fen, Jesus tempel modoũ namen ile, na dale dile disi dife mog, an irudidin. Ñ moni solo fediya§ neid tebol ado, kuburir na nigin sur fediya neid bens eleg feledin.

16 Tamo ganan, tempel modoũ bun safina na nē iroulediya nigin katũ fiyēdin.

† **11:9:** Anñ nē gariya, ‘Usennamã!’ Od anñ tamo kayau Negur yana yaleseya nigin wogō dedig. ‡ **11:9:** Sam 118:25, 26

§ **11:15:** Tempel takis inoya nigin, moni serē tamal ado tempel moni solo difedig.

17 Agef fen, Jesus ifelneïd iron,
 “‘Neu fõ, teneub ganan nē kosēya fõ douf,’*
 are Negur nē Itotoya bun to yenek de?

Anī ere, ā ‘bē tamo neid iminēya fõ’† unogen.”

18 Age ye di, pris odudug, lo ifelnēdiya tamo geid, od enī karī de fen, Jesus dukesiyouf nigin naab dimiren. Idi Jesus kumī difiyen, ere nigin, tamo kayau ganan in ifelnēdin anī nigin terē den.

19 Aragau di, idi taun anī ditor dilen.

Aa Fig Gariri Kelen
(Matyu 21:20-22)

20 Bonimeï idi naab diyok dile fen, idi aa fig warei bunem gariri kelen anī dilen.

21 Pita weder fokō yel fen, Jesus irokenen, “Rabi, ulef! Ō aa fig usisin, are gariri kelen!”

22 Age ye di, Jesus solof irokenēdin, “Negur bun momoi wogeï.

23 Aya ā momoi arokeneik, aibem taka arei enī irokenēf, ‘Ō kusu urā, maaīwō usil,’ age ye fen, ī wau to uru fen, momoi aya orok anī agef wō youf, youf are, agef dō fenēf.

24 Anī nigin, aya ā arokeneik, ereb taka nigin ā kosē bun tog fen, mogo malel ge, momoi gouf, are āgenei youf.

25 Sain ā ufareg kosēg fen, ā takan nē sane nigin wauī bun yenēf are, wedereī tu kalauf. Ago ge

* **11:17:** Asaia 56:7 † **11:17:** Jeremaia 7:11

di, āgenei Temeĩ saa tanon ibodok, āgenei mosor nigin weder tu kalauf.”‡

Jesus Aim Igirnen Anĩ To Difiyen
(*Matyu 21:23-27; Luk 20:1-8*)

²⁷ Idi baban Jerusalem wō den, Jesus tempel fofomalan iyok ile mog, pris odudug, lo ifelnēdiya tamo, mudur adodo geid, ĩ wagen disin.

²⁸ Idi Jesus to difiyen, “Ere igiriya bunem, ō ereb ereb enĩ ago wof? Aim ō enĩ agouf nigin igirnon?”

²⁹ Jesus aitedin yale iron, “Aya to fiya tekelei afeneif. Solog urokanage di, ereb igiriya bunem ereb ereb enĩ age afef anĩ, aya ā arokeneif.

³⁰ Jon naan igunēdin, are saa ilun tamal de, tamo bunem? Urokanag!”

³¹ Idi dogo dogol katō de fen, diron, “Ada, ‘Saa ilun tamal,’ tauf, ĩ to fouf, ‘Age fe di, ere nigin, ā ĩ nigin to momoi gen?’

³² Anĩ ere, ada, ‘Tamo bunem,’ tauf...” (Idi tamo kayau kumĩ difedin, ere nigin, tamo ganan, Jon ĩ momoi bagai profet den.)

³³ Anĩ nigin, idi Jesus ait solo de diron, “Amā keleĩ sã.”

Age de di, Jesus iron, “Ayag ā to arokeneif, ereb igiriya bunem aya ereb ereb enĩ age afedif.”

12

Tamo Kabĩ Lo Difedig Nē Yaab Od
(*Matyu 21:33-46; Luk 20:9-19*)

‡ **11:25:** Itotoya tunĩ eig de ditoton: *kalauf*. ²⁶ *Ā wedereĩ to tu kalauf are, āgenei Temeĩ saa tanon ibodok ĩg, āgenei mosor nigin weder to tu kalauf.*

¹ Age ye fen, Jesus yaab od nem idi irokenēdin, “Tamo taka wain kabĩ yalen. Ĩ kau ifō kalĩ felen, wain sumin asi fiya nigin ku yalen, kabĩ lo fiya tamo neid fō inon. Agef fen, ĩ mala solo yalouf nigin wain kabĩ, kabĩ tamo tunĩ imeid bun ino fen, uyu takã ilen.

² Fito fiya sain, ĩ, kabĩ tamo taka, wain kabĩ lo fiya tamo gedin, wain biya tunĩ, idi bun gei fouf nigin sur fen.

³ Anĩ ere, idi ĩ dale, du ken, sur difiyē di, ima sāsã ilen.

⁴ Age dife di, ĩ kabĩ tamo taka idi gedin sur fen. Idi tamo anĩ mudur bun du ken, mama difenē di, ilen.

⁵ Ĩ baban takag sur fen, areg idi dukesin. Ĩ musei tunĩg sur fedin, age fe di, tunĩ diden ken, tunĩ didenkesin.

⁶ “Ĩ gama tekelei dogol sur fiya nigin ibodon, are yogo naal, ĩ yogon oboi bagai. Ĩ anĩ dumen bagai sur fiye ken, iron, ‘Idi neu kesu anĩ karĩ difiyēf.’

⁷ “Anĩ ere, kabĩ lo fiya tamo, idi abob dirokenen, ‘Eĩ ĩ akorouf. Usig, ada ĩ tau keis fen, akor eĩ nedauf.’

⁸ Anĩ nigin, idi ĩ dale, dukeis fen, wain kabĩ dumeitur diran.

⁹ “Age dife di, wain kabĩ marau naig fouf? Ĩ isi, kabĩ lo fiya tamo idenkeis fen, wain kabĩ anĩ tamo tunĩ ifenēdiyof.

¹⁰ Ā Negur nē Itotoya enĩ to uwesegen de?

“ ‘Meein are fō inoya tamom sane de fen, ditoron, meein anĩ gama monog tor wō yen,

¹¹ anĩ Odug yogo age fe di,

malamã yũ yalen.* ”

¹² Age ye di, pris odudug, lo ifelnēdiya tamo, mudur adodo geid, Jesus ironēya nigin naab dimiren, ere nigin, idi kelein, ī idi nigin yaab od wogō yen. Anī ere, idi tamo kayau nigin kumī de fen, idi ī ditornē dilen.

Sisa Takis Ifenēya

(Matyu 22:15-22; Luk 20:20-26)

¹³ Dum idi, Farisia tamo tunī, Herod nē tamo tunī geid, Jesus garan in od bun kū fenē di, dirounēf nigin sur difedin.

¹⁴ Idi ī garan disi fen, diron, “Tise, amã kelei, ò momoi wogōya nē tamo. Ò tamom to wewu diyōdig, ere nigin, ò idi yeneid ado be, sã anī to es wedidig. Ago fen, ò momoi bagai Negur nē naab ufelnamādig. Sisa† takis ifenēya nigin biya de, sã?

¹⁵ Amã mafenēf de, sã?”

Anī ere, Jesus idi neid namedin kisi sane kelei ken, iron, “Ere nigin ā aya nigin kor unogef? Koin moni taka urousig len, aya ailau fenē.”

¹⁶ Idi koin moni taka dirousi di, ī idi to fedin, “Eī ai nē malakanon? Eī ai yana nē itotoya?”

Idi aiten dale diron, “Sisa nē.”

¹⁷ Age de di, Jesus idi irokenēdin, “Sisa nē are Sisa wenēg, Negur nē are Negur wenēg.”

Age ye di, idi ī nigin terē den.

Kel Fāya Bun Ai Nē Kayau Ibodōf

(Matyu 22:23-33; Luk 20:27-40)

¹⁸ Sadusia tamo idi dirōdig, laa bun tamal to ke de fã dedig anī, Jesus wagen disi to difiyen.

* **12:11:** Sam 118:22, 23 † **12:14:** Rom neid king odug.

19 Idi diron, “Tise, Moses itotkanaman, are tamo taka laaf fen, aiwa itornen, anĩ ere, kesu sã, tamo ĩ waab anĩ yale fen, tura nẽ kesu diroukenẽf.

20 Gama tura tura sewen dibodon. Matu ketem kayau yalen, anĩ ere, kesu yaleya sã mog, laa fen.

21 Matu dõ fiya bagam waab anĩ yalen, anĩ ere, ĩg kesu sã mog, laa fen. Idi dõ fediyag de age fen.

22 Tura tura sewen anidi adok, kesu taka to dalen. Dum kayau areg laa fen.

23 Dum laa bun tamal kel fãya sain bun, ĩ ai nẽ kayau ibodõf, ere nigin, tura tura sewen anidi adok, ĩ dale dogolen?”

24 Jesus aitedin yale irokenẽdin, “Ã od kũ wenẽgef, ere nigin, ã Negur nẽ Itotoya ado Negur nẽ megeir keleĩ sã.

25 Sain laa bun tamal kel fãya bun, an tamo kayau ado abob yalef ya sãf, idi engel saa ilun dibodok gen dibodõf.

26 Gama, laa bun tamal fãya nigin, Moses nẽ od Negur nẽ Itotoya bun ibodok, are arein aa mata bun fotou fiyen Negur ĩ naig fe irokenen, ‘Aya Abraham nẽ Negur, Isak nẽ Negur, Jakop nẽ Negur’‡ anĩ to be uwesegen de?

27 ĩ laa neid Negur sã, anĩ ere, ĩ mata ibodõya neid. Ã fatuk bagai kũ wenẽgef!”

Ītãfiya Odug Bagai Ganan Wal Fiya
(Matyu 22:34-40; Luk 10:25-28)

28 Lo ifelnẽdiya tamo taka isi, idi od nem kusĩ de mog, karĩ fiyẽdin. Jesus ĩ aiten, od biya irokeneĩd

‡ 12:26: Eksodas 3:6

mog, karĩ ye fen, ĩ Jesus to fiyen, “Ītãfiya ganan bun, ĩtãfiya nanĩ anĩ ganan wal fiya?”

²⁹ Jesus iron, “Ītãfiya ganan wal fiya are enĩ, ‘O Israel, karĩ wog, Odug neda Negur, Odug ĩ yogo tekelei.

³⁰ Ō, Odug ogon Negur ĩ nigin waũ adok, malãkanon adok, kisi adok, megeir adok bunem, ĩ nigin waũ laaf.’Š

³¹ Anĩ dõ fiya are eig fiya, ‘Ō ogo nigin waũ laa fef gen, nẽ tã nigineg ago waũ laaf.’* Ītãfiya uru enim, ganan wal fiya.”

³² Lo ifelnẽdiya tamo anĩ Jesus irokenen, “Tise, õ de urok. Negur ĩ tekelei, taka to ibodok, Negur yogo dogol wof, anĩ bun momoi urok.

³³ Ō Negur nigin waũ adok, kisi adok, megeir adok bunem waũ laaf fen, õ ogo nigin waũ laa fef gen, nẽ tã nigineg ago waũ laafei yeya anim, yã bun sesewi fiya ado sesewi fiya fire fire ganan wal fiya.”

³⁴ Jesus tamo anĩ keleĩ ado aiten yale di, ile fen, Jesus ĩ irokenen, “Ō Negur nẽ tano nigin egerõ sã.” Sain anĩ bunem ilen, taka nem baban to fiyẽya nigin kumĩ den.

Ai Nẽ Kesu Anĩ Kristus?

(Matyu 22:41-46; Luk 20:41-44)

³⁵ Jesus tempel modoũ bun ifelneĩd fen, ĩ to fedin, “Naig fe di, lo ifelnẽdiya tamo, Kristus ĩ Dawid nẽ naal dedig?

³⁶ Dawid ĩ yogo Awa Uur Fateul bunem wogõ ye fen, kurõ falaisin:

Š **12:30:** Diuteronomi 6:4, 5 * **12:31:** Levitikas 19:18

“ ‘Negur, neu Odug irokenen,
 “Imau biya melem ubod mog,
 ogon kiwai tar
 on yē farumē gō afalauf.” ’

³⁷ Dawid yogo, ī nigin ‘Odug’ yef, naig fe di, ī Dawid naal ouf?”

Tamo kayau musei waud el fiya ado karī difiyen.

³⁸ Jesus ifelneīd fen, iron, “Lo ifelnēdiya tamo nigin lo welegei. Idi gabar meluluk difonunakel diyo ken, maket modoū bun aan difiyēdiyof anī orodidig.

³⁹ Age de fen, idi Juda neid uub fō bun, sia biyai biyai bun dibod ken, tar inoya bun modoū malabag bun dibodōdig.

⁴⁰ Idi, kayau waab idegnēdiya bunem nedi fō sosoin de fen, meleid yaleya nigin meluk bagai kosē dedig. Tamo age fediya, mala solo sane bagai dalouf.”

Kayau Waab Nē Ofa
(Luk 21:1-4)

⁴¹ Jesus ofa moni bogis sitakā ibod ken, tamo kayau lo feid mog, idi moni tempel bogis bun dinon. Tamo kayau safineid adodo musei moni odudug diraran.

⁴² Anī ere, kayau waab maleg taka isi, kapa koin moni giriya nanaal bagai uru inon. Are tu toea dogol.

⁴³ Jesus in dō fiya tar iweig laisi fen, irokenēdin, “Aya ā momoi arokeneik, kayau waab maleg enī ī, ganan wal fediya, odug bagai bogis bun inol.

⁴⁴ Idi ganan dogo neid safineid bun tamal tunĩ dinon, anĩ ere, kayau maleg anĩ, ereb ereb adok ĩ isennĕf anĩ ganan inon.”

13

Idikeleya Sain Nĕ Uris (Matyu 24:1-35; Luk 21:5-33)

¹ Jesus ĩ tempel bunem kutũ yeis mog, in dō fiya tar taka ĩ irokenen, “Ule, Tise! Ere meein odudug oug fediya! Ere fō meli meli oug fediya!”

² Age ye di, Jesus ĩ irokenen, “Fō odudug enĩ ganan uledif de? Meein enĩ taka to abob teten yenĕf, anĩ adok fau isog irailauf.”

³ Jesus Moul Arein tempel sitakā ibod mog, Pita, Jems, Jon, Endru anidim mugun Jesus to difiyen,

⁴ “Ere sain enidi wō youf? Ere uris bagai anĩ, enĩ ganan kisi falauf nigin wō youf? Anĩ urokanamā.”

⁵ Jesus idi irokenĕdin, “Takam idegneĩya nigin lo weleg.

⁶ Musei aya yanau nem disi dirōf, ‘Aya Kristus,’ age de fen, musei didegnĕdiyof.

⁷ Sain ā kusĩ nigin karĩg fen, tamo sigoredim kusĩ nigin wogō douf anĩ karĩ gouf, ā to tererĕ gei. Ereb ereb anidi agef wō youf, anĩ ere, idikeleya sain fau dum isiyof.

⁸ Teneub taka fā ye fen, ĩ teneub taka nigin kiwai ifenĕf, tano taka ĩ, tano taka nigin kiwai ifenĕf. Uyu taka taka bun mimĩ wō ye fen, naũ isiyof. Age foug anĩ, kayau kesu gō foug nigin darau gariya inodig age fiya.

9 “Ã aug nigin lo weleg. Ã fau kaunsel imeid bun dinenei ken, uub fõ bun wagagã diyeĩf. Aya yanau nigin, ã gawaman mudur, king geid meleid bun ufareg fen, idi kurõ walaisig urokenēdigouf.

10 Biya od ketem teneub ganan bun iyokalauf.

11 Sain ã gei diyei ken, kot bun dirouleyeĩf, ere mauf wog fen, to kisi musei waleg. Sain anĩ bun, ereb ifeneik anĩ wogõ gouf, ere nigin, are āgem to wogõ gouf, are Awa Uur Fateulem.

12 “Turam, tura kiwai imeid bun ino di, dukesiyouf, age fe di, tamam in kesu age fouf. Kesum sina tama kiwai difeneĩd fen, laa bun dinenēdiyof.

13 Tamo ganan aya nigin ã kiwai difeneĩf, anĩ ere, taka ĩ megeir ifaref ile ile idikeleyanouf, Negur ĩ yalouf.

14 “Sain ‘ninin anĩ fonou inouf nigin’* ĩ an to ifarau nē anĩ ulogouf (anĩ uweseg, keleĩ youf), idi Judia distrik bun dibodok, arein diya diselauf.

15 Taka ĩ yogon fõ agaran ibodok, ĩ kutũ yeis, aaben ile, ereb ereb to yalouf.

16 Taka ĩ kabier ibodok, yogon gabar yalouf nigin to kel ilauf.

17 Naa anĩ bun, kayau bouweid ado, kayau kesu su difenēdif ado, idi meleidlon ado!

18 Feluk sain bun, anĩ to wõ youf nigin, ã Negur kosē wiyēgouf,

19 ere nigin, naa anidi bun morõ odug biya adouf, morõ age fiya, gariya bun Negur teneub inon bunem isi gama, taka to wõ yen, dum buneg taka to wõ youf.

* **13:14:** Daniel 9:27; 11:31; 12:11

²⁰ Odug morõ odug nẽ naa anĩ to guru falaisim, taka to ibodom. Anĩ ere, tamo kayau ĩ igirnẽdin nigin, ĩ naa anĩ guru falaisin.

²¹ Sain anĩ bun, taka ã irokeneĩf, ‘Ulegef, Kristus yeir!’ oo ‘Ī your!’ ã anĩ to momoi ge.

²² Fau idegẽya Kristus, idegẽya profet ado, wõ de fen, idi kisi falauf are, Negur igirnẽdin anidi didegnẽdiyof nigin uris memelik ado dinodiyouf.

²³ Anĩ nigin, lo welegei, sain anĩ fau mog, aya ã ereb ereb ganan arokenein.

²⁴ “Anĩ ere, naa anidi bun, morõ anĩ dõ fiya, “gaa gugum kalauf, age fe di, ogõ lalan to ifenẽf,

²⁵ saa ilun tamal barisa kuku rouf, saa nẽ megeir ganan guyoyõ douf.’†

²⁶ “Sain anĩ bun, tamo idi, Tamo Naal lalo bun yogon megeir odug fula fiya medeĩya ado isi mog, dilouf.

²⁷ Agef fen, ĩ yogon engel susur fedi di, yogon tamo kayau igirnẽdin anidi, teneub akor ganan bun, gaa iseya nem ile gaa ileyen, gei de, kuru difediyouf.

²⁸ “Gama ã, aa fig bun keleĩ walogouf. Susu bonuf fen, aarau inodif, ã keleĩ, saneya melsak.

²⁹ Age fiya gen, ã ereb ereb anĩ wõ youf ulogouf, ã keleĩ, are mogo melsã bagai bobogẽ ifaref.

³⁰ Aya ã momoi arokeneik, tamo kayau sain enĩ bun dibodok eneidi to gare de mog, enĩ ganan wõ youf.

³¹ Saa teneub ado sa kalauf, anĩ ere, neu od to bagai sa kalauf.

† 13:25: Asaia 13:10; 34:4

*Naa Sain Ado Takam To Keleĩ Youf
(Matyu 24:36-44)*

³² “Taka nem naa sain ado to keleĩ youf, saa ilun engel idig sã, Naal ãg sã, Dei yogo dogol.

³³ Mata ubodõg fen, lo weleg! Ereb sain anĩ wõ youf, ã to keleĩ youf.

³⁴ Are tamo fõ itor ileya gen. Ì yogon fõ itor ken, lo difouf nigin yogon ferfer imeid bun inon, idi mugu mugu kabĩ fire fire ifenēdin. Agef fen, ì tamo bobog bun anĩ mala inof ibodõf nigin irokenen.

³⁵ “Anĩ nigin, mata ubodõg fen, lo welegei, ere nigin, ã keleĩ sã, ereb sain fõ marau kel isiyouf, aragau be, bõ atun be, tataro yũ mog be, wef mog be.

³⁶ Ì isi tarabã yeĩf, ã to wenēg mog, ileyēĩf, are deuf.

³⁷ Ereb aya ã arokeneik, aya adok ganan aro-kenēdif, ‘Lo weleg!’ ”

14

*Kayau Taka Betani An Jesus Mudur Bun Moul
Fi Felen*

(Matyu 26:1-16; Luk 22:1-6; Jon 11:45-53; 12:1-8)

¹ Gama Pasa naa ado Bret Yis Sã Sifa naa, fau uru yen mog, pris odudug, lo ifelnēdiya tamo geid, Jesus idegēya naab bun dale dirou fen, dukesiyouf nigin naab dimiren.

² Idi diron, “Sifa sain bun to age tafouf, age tafouf are, tamo kayau seye de fen, kusĩ dale-sauf.”

³ Jesus Betani an, Simon kulu lepra dagi adon tamo, in fõ bun saaf yoko ibod mog, kayau taka ï wagen moul sumeĩ biya bagai moni odug nem, nad* nem dogol dinon anĩ, gulub† ado irou isin. Agef fen, kayau gulub anĩ karãf fen, Jesus mudur bun moul fi felen.

⁴ Age fe di, tunĩ an difaren are waud sane fen, abob dirokenen, “Ere nigin moul enĩ sekil fef?

⁵ Moul enei yar tekelei nẽ dimig mala wal feseya nem sur fiyam, agef fen, moni anĩ yale, maleg tamo ifenẽdiyam, are dem.” Age de fen, idi ï totol bagai ou difiyen.

⁶ Jesus iron, “Uturnẽg, ã ere nigin ï wau morõ wenẽgef? Kayau enĩ aya nigin biya bagai age fel.

⁷ Maleg idi faimud ã geid ubodõgouf, anĩ nigin, ã idi isennẽdiya oroyeĩf, are sain musei. Anĩ ere, aya faimud ã geid to tabodõgouf.

⁸ Ì ereb age fiya kisin anĩ age fel. Ì moul aya bouwau bun fi felel are, mekur ainẽf nigin anĩ ketem dodok fel.

⁹ Aya ã momoi arokeneik, tenebur ein nain be, biya od enĩ wogõ douf, ereb kayau enĩ age fel anĩg wogõ douf. Age fe di, idi ï nigin kisi difouf.”

¹⁰ Age ye di, Judas Iskariot, tuwelf anidi atun taka, Jesus kiwai ifen ken, pris odudug imeid bun inouf nigin wagedin ilen.

¹¹ Pris odudug idi od enĩ karĩ de, waud al fe fen, ï moni difenẽf nigin dirokenen. Anĩ nigin, ï Jesus idi imeid bun inouf nigin naab imirek ilen.

* **14:3:** Fisir yana, fisir anĩ warumutei bun moul daledig.

† **14:3:** Meein alabasta nem dinon.

Odug Nē Saaf

(Matyu 26:17-30; Luk 22:7-23; Jon 13:21-30; 1 Korin 11:23-25)

¹² Bret Yis Sā Sifa inoya naa matu anī bun, sain anī are idi neid tobonunā, sipsip naal, Negur tubuid tar isennēdin anī kisi de fen, sesewi difedig anī, Jesus nē dō fiya tar Jesus to difiyen, “Ō amā nain anī Pasa naa nē saaf wāf nigin, amā dodok mafouf anī oroyok?”

¹³ Age de di, Jesus in dō fiya tar uru sur feid fen, irokenēdin, “Taun uleg fen, tamo taka darum naan ado isi fotou yeif, ĩ dō gouf.

¹⁴ ĩ fō taka namen ile di, uleg fen, gama ā fō marau eig wiyēg urokenēgouf, “Tise to fel: Aya neu dō fiya tar geid, Pasa naa nē saaf māf nigin aab nain ibodok?”

¹⁵ ĩ aab odug ilun anī ifelneif, an ereb ereb dodok de bure difelen. An neda nigin dodok gouf.”

¹⁶ In dō fiya tar taun dile fen, Jesus iron kilei, ereb ereb age fiya dilen. Anī nigin, idi Pasa naa nē saaf dodok difen.

¹⁷ Aragau di, Jesus in dō fiya tar tuwelf geid, an wō den.

¹⁸ Idi tebol bun si dino, saaf dokon, Jesus iron, “Aya ā momoi arokeneik, ā atun takam aya kiwai imeid bun inoyauf, taka aya uruwom moko anim.”

¹⁹ Idi waud gudūf fen, mugu mugu dirokenen, “Momoi bagai, ayam sā de?”

²⁰ Jesus aitedin yale iron, “Ā tuwelf atun takam, taka ĩ, imamā uruwom beif bun nu mafef anim.

21 Tamo Naal ï nigin ditoton agef bai ilauf. Anï ere, tamo ï Tamo Naal kiwai tamo imeid bun inof, ï malalon ado! ï sina to gõ fem, are dem.”

22 Idi saaf dokon, Jesus bret yale, Negur de fiye ken, bret anï mumã fen. Agef fen, in dô fiya tar ifeneïd fen, iron, “Waleg, eï neu bouwau.”

23 Agef fen, ï kap yale, Negur de fiye ken, kap anï ifenëdin, age fe di, idi adok anï bun don.

24 Jesus idi irokenëdin, “Eï neu naudou, ã Negur geid bar itenëya nigin, are tamo kayau musei nigin fi felef,

25 aya ã momoi arokeneik, aya baban wain enï to ãf, gaman ile, aya Negur në tano bun wain mata ãf bun.”

26 Idi seg taka dalel fen, idi Moul Arei bun diselen.

*Pitam Jesus Wa Fiyëf Nigin Jesus Iron
(Matyu 26:31-35; Luk 22:31-34; Jon 13:36-38)*

27 Jesus idi irokenëdin, “Ã fau adok uyalalagauf, ere nigin, Negur në Itotoya eig ye irok:

“ ‘Aya sipsip marau aũ di,
sipsip ganan firagagaũ difouf.’

28 Anï ere, aya kel fã auf bun, aya ket Galili uyu alauf.”

29 Pita Jesus irokenen, “Ganan diyalalaufeg, aya sãf.”

30 Jesus Pita irokenen, “Aya õ momoi arokonok, gama bõ enï bun, tataro kokorok ye uru fiya sã mog, õ ogo aya nigin wa wo, towo wouf.”

31 Anï ere, Pita total bagai iron, “Momoi aya õ uruwom gare tauf nigin oufeg, aya õ nigin to

bagai wa afouf.” Age ye di, idig ganan od de tekelei anĩ diron.

Getsemane Oun
(*Matyu 26:36-46; Luk 22:39-46*)

³² Idi modoũ yana Getsemane dedig, an dilen. Age de fen, Jesus in dō fiya tar irokenēdin, “Ein ubodōg mog, aya kosē auf.”

³³ Ī, Pita, Jems, Jon anidi dogol geif fen, ĩ geid dilen. Agef fen, ĩ wau gũf fen, morō odug gudũ fen.

³⁴ Jesus idi irokenēdin, “Neu malaukanon to-bega le fen, wau morō gudũ feis, laa nē daũ bun ifaref. Ein ufareg fen, lo weleg.”

³⁵ Naal godof iroule fen, kisi falauf are, sain anĩ Jesus wal fiyēf nigin, ĩ tenebur kubũ ye fen, kosē yen.

³⁶ Jesus iron, “Aba,‡ Dei, ereb ereb ganan, õ age fiya kisi feleya. Kap enĩ walelkana. Anĩ ere, neu oroya anĩ to dō wo, on oroya dō wo.”

³⁷ Age fel fen, Jesus in dō fiya tar gedin kel isin, mulã den mog, iledin. Jesus Pita irokenen, “Simon, õ wenek de? Õ aua tekelei to mata ubodōf de?”

³⁸ Ā, kisi yeĩya bun to kubũ gouf nigin lo weleg fen, kosē gouf. Uur are orof, anĩ ere, bouwa anĩ malegef.”

³⁹ Ī baban kel ile, uruwa kosē yen gen, dōf age fen.

⁴⁰ Ī kel isin, baban denena mog, iledin, ere nigin, idi meleid morō gudũ fesin. Idi ĩ ereb fiyēya nigin taka to kisi difen.

‡ 14:36: Anĩ nē gariya, Aram od bun ‘Dei.’

⁴¹ Jesus kel towo fe fen, in dō fiya tar iro-kenēdin, “Ã fau si unog fen, yenēyai gef? Bure! Sain mogo isil. Ulegef, Tamo Naal mogo mosor tamo imeid bun ilef.

⁴² Fafāg fen, teleg! Kiwai imeid bun inoya tamo yeir isif!”

Jesus Dirounen

(Matyu 26:47-56; Luk 22:47-53; Jon 18:3-12)

⁴³ Jesus fau wogō ye mog, tuwelf anidi atun taka, Judas wō yen. Tamo musei dimig adodo, seburer adodo, ĩ geid disin. Pris odudug, lo ifelnēdiya tamo, mudur adodo idim sur difedi di, disin.

⁴⁴ Gama Judas ĩ Jesus yaor fiyēya nē uris nigin, idi faded fiyēdin: “Tamo aya umā afouf anī, ĩ waleg fen, uroug uleg.”

⁴⁵ Judas kaisā bagai Jesus wagen ile iron, “Rabi!” Agef fen, umā fiyen.

⁴⁶ Tamo idi Jesus ka dife dirounen.

⁴⁷ Age dife di, tamo melsā difaren anī takam dimig ul feis yale, pris mudur ado nē kabī tamo weder salōf iran.

⁴⁸ Jesus iron, “Aya bē tamo gen, ā dimig adodo, seburer adodo, waleyagau fenē usigef de?”

⁴⁹ Naa ganan, aya ā geid tabod ken, tempel fofomala bun afelnein, anī ā aya to urouyagen. Anī ere, Negur nē Itotoya bun ibodok anī kisi falauf nigin.”

⁵⁰ Age ye di, ganan ditornē diyalelen.

⁵¹ Tamo gaū taka, gabar lalau dogol ifonun ĩ, Jesus dō fen. Sain idi Jesus ka dife di,

⁵² ĩ gabar inū iraile, gemū iyawon.

*Jesus Juda Kaunsel Neid Kot Mala Bun Ifaren
(Matyu 26:57-68; Luk 22:54, 55, 63-71; Jon
18:13, 14, 19-24)*

⁵³ Idi Jesus dale, pris mudur ado wagen diroulen. Age dife di, pris odudug, mudur adodo, lo ifelnēdiya tamo geid, ganan disi guru difen.

⁵⁴ Pita Jesus dume dōf, tokō fel ile, pris mudur ado nē fō fofomalan wō yen. An ĩ kabī tamo geid dibod ken, yā imidirek ibodon.

⁵⁵ Pris odudug, kaunsel ganan geid, Jesus laa bun dinenēf nigin bouwa bun od dimiren. Anī ere, taka to dilen.

⁵⁶ Musei Jesus bouwa bun idegēya od diraran, anī ere, idi neid od tekelei sā.

⁵⁷ Age de fen, tamo tunī fafā de fen, Jesus bouwa bun idegēya od enī diran,

⁵⁸ “Amā karī mafiyē mog, iron, ‘Aya tempel tamom dinon anī narī afel fen, naa towo bun, taka, are tamom to inouf anī anouf.’ ”

⁵⁹ Anī ere, idi neid od anīg tekelei sā.

⁶⁰ Age de di, pris mudur ado wagedin fā ye ifar fen, Jesus to fiyen, “Ō to solo urōf de? Eī ere od anī tamo enidi dirousi, ō boū bun duk?”

⁶¹ Anī ere, Jesus ĩ mutū ifar fen, to solof iron.

Baban pris mudur adom, ĩ to fiyen, “Ō Kristus, Negur Naal de?”

⁶² Jesus iron, “Aya im, ā Tamo Naal Negur megeir ado ima biyalem ibod ken, saa lalo bun isi mog, ulogouf.”

⁶³ Age ye di, pris mudur ado in kolos serek fe fen, to fen, “Ere nigin ada od megeir fiya nigin tamo baban tamirēf?”

⁶⁴ Ā kono fiya od mogo karī gel. Ā ere kisi gef?”

Idi ganan ï laa foug nigin diron.

⁶⁵ Age de fen, tunï Jesus disisnẽ, mala difofakel fen, imedim dun. Age de fen, idi diron, “Aim inok kurõ weis urõ!” Age dife di, kusï tamo Jesus dale fen, dun.

Pita Jesus Nigin Wa Fen

(*Matyu 26:69-75; Luk 22:56-62; Jon 18:15-18, 25-27*)

⁶⁶ Pita fõ fofomalan tenebur ibod mog, pris mudur ado nẽ kabï kayau taka isin.

⁶⁷ Ï, Pita yã imidir mog, lo fel fen, iron,

“Õg Jesus Nasaret tamal geiden.”

⁶⁸ Anï ere, ï waf fen, iron, “Õ od urok enï, aya keleï sã.” Age ye fen, ï bobogẽ iyok ilen.

⁶⁹ Kabï kayau anï Pita an ile fen, ï baban an difaren anï irokenẽdin, “Tamo enï are idi neid taka.”

⁷⁰ Ï baban wa fen.

Sain naal ilele di, idi melsã difaren anidim Pita dirokenen, “Momoï bagai, õ idi neid taka, ere nigin, õ Galili tamal.”

⁷¹ Ï mogo yogo bouwa geluf fen, totol od irokenẽdin, “Tamo ã urõgef anï, aya keleï sã.”

⁷² Age ye mog, kaisã bagai, tataro baban kokorok yen. Age fe di, Pita Jesus od irokenen anï weder fokõ felen: “Tataro fau kokorok ye uru fiya sã mog, õ aya nigin wa wo, towo wouf.” Anï bunem, ï kusureis fen, inã yalen.

15

Jesus Pailat Mala Bun Ifaren

(Matyu 27:1, 2, 11-26; Luk 23:1-5, 13-25; Jon 18:28-19:16)

¹ Bonimei bagai, pris odudug, mudur adodo, lo ifelnēdiya tamo, Juda neid kaunsel ganan geid, od difon. Idi Jesus difō dale dirou, Pailat ima bun dinon.

² Pailat Jesus to fiyen, “Õ Juda neid king de?”

Jesus solof iron, “Are de yer, õ urok anĩ.”

³ Pris odudug ã bouwa bun od musei dun.

⁴ Anĩ nigin, Pailat baban Jesus to fiyen, “Õ to solo wo urõf de? Ereb erēb musei nigin bouwã bun od dinof anĩ ulef.”

⁵ Anĩ ere, Jesus fau od taka to solo fen. Age fe di, Pailat terē ye fen, kisi musei yalen.

⁶ Gawaman nē tobonunã are, Pasa Sifa inoya bun tamo kayau dirō di, kalabus bun tamo taka dalisnēdig.

⁷ Tamo taka yana Barabas ã, tamo kusĩ dales fen, tamo didenkesin, kalabus bun dinenan anidi neid taka.

⁸ Tamo kayau mala odug dise, Pailat gai age fedig anĩ, age fenēdiyof nigin to difiyen.

⁹ Pailat to fedin, “Ã aya Juda neid king anĩ aliskeneĩf de?”

¹⁰ Pailat keleĩ, pris odudug idi kiyeĩ dino fen, Jesus ã ima bun dinon.

¹¹ Anĩ ere, pris odudug tamo kayau waud dale fen, dirokenēdi di, idi Jesus ban Barabas anĩ Pailatem yaliskēdiyof nigin diron.

¹² Pailat idi to fiyēdin, “Juda neid king gedig anī, aya ī nigin naig afiyēf?”

¹³ Idi diweig diron, “Aa tetek bun ūf!”

¹⁴ Pailat idi to fiyēdin, “Ere nigin? Ere mosor ī age fen?”

Anī ere, idi total bagai diweig diron, “Aa tetek bun ūf!”

¹⁵ Tamo kayau waud el foug nigin, Pailat Barabas yaliskēdin. Pailat irō di, Jesus wagī difiye ken, aa tetek bun dūf nigin, kusī tamo imeid bun inon.

Kusī Tamo Jesus Ketē Difiyen

(Matyu 27:27-31; Jon 19:2, 3)

¹⁶ Kusī tamo idi, Jesus dale dirou gawaman mudur nē fō aaben dile fen, kusī tamo ganan diweignēdi di, guru difen.

¹⁷ Idi gabar kadaū difounkenen, age de fen, idi malū duri ado dale, teter tanak kori de fen, ī mudur bun kurū difen.

¹⁸ Age de fen, idi ī diweig dirokenen, “O, Juda neid king gai gai ibodōf!”

¹⁹ Baba baban idi werī tibog nem mudur bun du ken, disisnen. Idi iboreid bobou de, kususu de fen, ketē difiyen.

²⁰ Idi ketē difiye kel fen, gabar kadaū dinukeis, yogon gabar bagai anī difounkenen. Age de fen, idi ī aa tetek bun dūf nigin dirou diselen.

Jesus Aa Tetek Bun Dun

(Matyu 27:32-44; Luk 23:26-43; Jon 19:17-27)

²¹ Tamo taka Sairini tamal, yana Simon, Aleksanda Rufus ado neid temeid, ī yogon fonom isi,

luwen wal fediyoũ mog, idi Jesus nẽ aa tetek faali foun nigin nugo difiyen.

²² Idi Jesus modoũ yana Golgota (anĩ nẽ gariya, Mudur Tuwa nẽ Modoũ) an dirou diselen.

²³ Age de fen, idi Jesus darau naal to karĩ youf nigin wain marasin* taka ado falei de difenen, anĩ ere, ã to yon.

²⁴ Idi ã aa tetek bun du ken, in gabar foi de fen, aibem ereb anĩ yalouf nigin aisai kodẽ den.

²⁵ Bonimeï nain kilok bun, idi ã aa tetek bun dun.

²⁶ Jesus bouwa yũya od eig de ditoton: JUDA NEID KING.

²⁷ Idi bẽ tamo urug, ã geid aa tetek bun didenen, taka Jesus ima biyalẽ, taka ima kilẽ.†

²⁹ Tamo kayau dile disi dife, kono difiye ken, kasã difiyẽ, mudureid dira ken, diron, “Õ, tempel narĩ afel fen, baban naa towo bun anouf, won,

³⁰ õ ogo nigin usenne ken, aa tetek bun tamal kutũ weis!”

³¹ Age difiyen gen, pris odudug, lo ifelnẽdiya tamo geid, idi dogo dogol wogõ de fen, ã ketẽ difiyen. Idi diron, “Ï tunĩ isennẽdidig, anĩ ere, ã yogo isennẽya kisi feleya sã!

³² Kristus enĩ, Israel neid King, utornẽg len, gama aa tetek bun tamal kutũ yeis len, tail fen, momoi tauf.” Idi ã geid aa tetek bun didenẽdineg, ã kono difiyen.

* **15:23:** Marasin nẽ yana, ‘mer (myrrh).’ † **15:27:** Itotoya tunĩ eig de ditoton: kilẽ. ²⁸ Age de fen, Negur nẽ Itotoya enei kisi felen, “Ï lo difodulẽdig anidi geid bagu difedin.” (Asaia 53:12)

Jesus Laa Fen

(Matyu 27:45-56; Luk 23:44-49; Jon 19:28-30)

³³ Gaa atun tuwelf kilok bun, gugum isi, teneub ganan kerū fel ile, tri kilok aragaun.

³⁴ Aragau tri kilok bun, Jesus wade bagai iweig iron, “Eloi, Eloi, lama sabaktani?” –ani nē gariya, “Neu Negur, neu Negur, ere nigin ō aya utornal?”[‡]

³⁵ Tunī melsā difaren, anī karī de fen, idi diron, “Karīg, ī Eliya iweignek.”

³⁶ Tamo taka gudu re ile, spons§ yalen, wain makik ado bun nu feis fen, tibog bun ino fen, Jesus yāf nigin ifenen. Agef fen, ī iron, “Gama utornēg. Eliya isi yaleisnē mog, tailauf.”

³⁷ Jesus ait odug nem iweig fen, laa fen.

³⁸ Tempel nē gabar faraf uru fen, ilunenem irousil teneburen.

³⁹ Kusī tamo neid orowa, Jesus wagen an ifaren anī, in kaīya anī karī ye, in laa anī ile fen, iron, “Mmoi bagai, tamo enī Negur Naal!”

⁴⁰ Kayau tunī so del difar fen, lo difen. Idi atun, Maria Magdala, taka Maria, Jems naal bagai Josep ado neid sineid, taka Salome.

⁴¹ Galili an kayau enidi Jesus dō difiye ken, aruna dalen. Kayau musei, Jesus geid Jerusalem diselen anidig an difaren.

Jesus Mū Difen

(Matyu 27:57-61; Luk 23:50-56; Jon 19:38-42)

⁴² Naa are dodok fiya nē naa (naa anī bure fele di, Sabat naa wō youf). Aragau mog,

[‡] 15:34: Sam 22:1 § 15:36: Maaīwō tamal safina taka, ku nanaal musei ado naan dū fedig.

⁴³ Josef, Arimatea tamal, ï kaunsel neid odug taka, ï yogo anï Negur nẽ tano tari fen, ï kumï sã Pailat garan ile, Jesus bouwa buru yalouf nigin to fiyen.

⁴⁴ Pailat Jesus mogo laa fel ya anï karï ye fen, terẽ yen. Ï kusï tamo neid orowa iweigne ken, Jesus mogo be laa fel anï, ï to fiyen.

⁴⁵ Sain ï kusï tamo neid orowa bun laa fel ya karï ye fen, ï Jesus bouwa buru yaleya nigin Josef yo fiyen.

⁴⁶ Age fe di, Josef gabar lalau na yale fen, bouwa buru yaleis, gabar lalau anim sile fen. Agef fen, ï matmat sa bun ku dalen anï kur inenen. Gama ï meein wele fe di, matmat bobog katï felen.

⁴⁷ Maria Magdala, Maria Joses nẽ sina ado, ï dinenen modoũ anï dilen.

16

Jesus Mata Kel Fã Yen

(Matyu 28:1-8; Luk 24:1-12; Jon 20:1-10)

¹ Sabat naa bure fele di, Maria Magdala, Maria Jems sina, Salome anidim dile, Jesus bouwa bun wã difouf nigin, moul sumeï biya na gei difen.

² Uub nẽ naa matu bun* bonimeï bagai, we kurã fel mog, idi matmat bun naab diyok dile fen,

³ idi abob to difen, “Aim matmat bobog bun meein wele fel kanadauf?”

⁴ Age de fen, meleid diran, idi meein odug biya anï wele feleya dilen.

* **16:2:** Are Sande.

⁵ Idi meku namen dilen, tamo gaũ taka gabar lalau ifounkel, ima biya melem ibod mog, dile fen, terẽ den.

⁶ Ĩ iron, “To terẽ wog, ã Jesus Nasaret tamal aa tetek bun dun anĩ umirnẽgef. Ĩ mogo fã yel! Ĩ ein sã. Idi ĩ dinenẽ yenen modoũ anĩ uleg.

⁷ Anĩ ere, uleg, in dõ fiya tar Pita geid uro-kenẽdig, ‘Ĩ ketem Galili ilef. An ĩ ulogouf, ĩ irokenein kilei.’ ”

⁸ Idi terẽ de fen, waud firagagaũ felen, anĩ nigin, kayau idi ulolõ deis, meku ditor diyawon. Idi kumĩ den nigin, aib taka to dirokenen.

[Itotoya tunĩ kulu bagai od gariya dino fen, ditoton anĩ bun, Mak 16:9-20 to ibodok.]

*Jesus Maria Magdala Bun Wõ Yen
(Matyu 28:9, 10; Jon 20:11-18)*

⁹ Jesus, uub nẽ naa matu bun bonimei bagai, fã ye fen, ĩ Maria Magdala bun ketem wõ yen, kulu Jesus kaa sesen sewen kayau anĩ bun irudin.

¹⁰ Ĩ ile, idi Jesus geid diyon anidi, waud gudũf fen, marudim difen anĩ irokenẽdin.

¹¹ Idi, Jesus mata fã yel, kayau ĩ ilel ya anĩ karĩ de fen, waud to momoi den.

¹² Dum in dõ fiya tar uru naab diyok dile mog, Jesus bouwa fire bunem, idi atun wõ yen.

¹³ Age fe di, idi keku de disi, an difaren anidi dirokenẽdin, anĩ ere, idi niginen to momoi den.

¹⁴ Dum idi llewen, saaf doko dibod mog, Jesus idi bun wõ ye fen, ou fiyẽdin, ere nigin, idi Jesus fã yel mog, dilen anĩ to momoi de fen, waud katĩ difelen nigin.

¹⁵ Jesus irokenēdin, “Ã teneub ganan bun uleg fen, biya od tamo kayau ganan urokenēdig.

¹⁶ Taka ĩ momoi ye fen, naan yalef are, ĩ kel yalouf, taka ĩ to momoi yef are, es fiya bun inenēf.

¹⁷ Momoi def idi, uris enidi idi bun wõ youf, idi aya yanau nem kaa sesen dirudiyouf, idi od mata mata wogõ douf.

¹⁸ Idi imedim gogour dale diroudiyouf, takag, laa nē mū sane dāf, to mū idenēdiyof, takag, idi dagi tamo bun imeid dino di, dagi sa kalauf.”

Jesus Saa Ilun Irou Iselen

(Luk 24:50-53; Aposel 1:9-11)

¹⁹ Odug Jesus irokeneīd bure fele di, Negur Jesus yale, saa ilun irou isel, Negur ima biyalē ibodok.

²⁰ Anĩ nigin, in dõ fiya tar dile, teneub ganan bun biya od wogõ den. Age dife di, Odug idi ado kabĩ yale di, uris bunem yogon od anĩ megeir fen.

Mata Ifenēya Nē Od
The New Testament in the Marik Language of Papua
New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Apr 2025 from source files dated 31 Aug 2023

d7099f9d-3bdf-5620-8eb3-7e6c51cab7ea